

事文類聚 新集

八十九、九十

存
台61
之

漢書門	六一二六	函	號	類
	六一二六	架	冊	類
	六一二六	架	冊	類
	六一二六	架	冊	類

內閣文庫	漢書	六一二六	函	號	類
		六一二六	架	冊	類
		六一二六	架	冊	類
		六一二六	架	冊	類

內閣文庫	
番號	漢 6126
冊數	61 (46)
函號	365 31



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak




綴じ部(喉部分)の文字など開きが不鮮明な箇所あり

事文類聚新集

八之九


七

4
2
89



館書圖京東				漢書門
一	二	別	類	類
〇	〇	加	書	
冊	號	架	函	

不許帶出



新編古今事文類聚卷之八

新集

南江富大用時可編

省屬部

左右丞

歷代沿革

漢成帝建始四年置尚書負五人
有四丞光武始減其二唯置左右

丞掌錄文書期會左丞主吏民章服及騶伯
史右丞假署印綬及紙筆墨諸財用庫藏至

晉不改晉左丞主臺內禁人宗廟祠祀朝儀

淺草文庫

禮制選用署吏給假右丞掌臺內庫藏及諸器用民戶租布刑獄軍器督錄遠近文書章表奏事宋齊梁隋皆有是官唐龍朔元年改左右丞曰左右肅機咸亨元年復舊名五代梁開平二年改左右丞為左右司侍郎避朝諱也至後唐同光元年復舊宋元祐令尚書左右丞並正二品為執政官大元以為宰相之貳佐治省事

羣書要語

尚書左丞彈八座以下居機密之會斯乃皇朝之司直天臺之管轄

傳咸答李光序

古今事實

左君右君

漢制丞郎見二丞呼曰左君右君

宋百官志

左綱右轄

白居易為授庾承宣尚書左丞制云吾前命崔從持左綱今乃命承宣操右轄無俾戴劉魏杜專美於貞觀中

號曰神人

張諛少修志節性聰明有令才鄉曲號曰神人

除尚書侍郎左丞進對威儀辭言辨遠帝深奇
之後漢書

方於管轄

唐劉洎上疏曰尚書萬機是為政本是以八座
比於文昌二丞方於管轄

八座畏憚

晉荀勗為左丞廉察諸曹八座已下皆側目憚
之

三臺肅清

晉劉暉為尚書右丞正色在朝三臺肅清

臺閣自肅

晉傅咸為右丞臺閣大小望風自肅諸公贊
郎吏修整

韋弘景素以鯁亮稱及拜左丞居網轄之地郎
吏望風修整

職稱朕望

唐戴胄拜尚書右丞尋遷左丞太宗謂胄曰尚
書省天下網維百司所稟若一事有失天下必
有受其弊者今無令僕保之於卿當稱朕所望
也胄性明敏處斷明速議者以為左右丞稱職

武德以來一人而已

功滿詔留

黃香拜左丞功滿當還詔書留增秩拜尚書遷
僕射東觀漢記

豪貴拂席

王維以詩名盛於開元天寶間諸王駙馬豪貴
之家無不拂席迎之乾元中為尚書右丞

有司供帳

張說代源乾曜為左丞視事之日上勅所司供
帳設音樂內出酒食御製詩一篇以叙其事

記令史名

劉覽除尚書左丞令史七百人一見並記姓名
當官清正無所私

對三騶飲

南史尚書二丞給三騶謝幾卿性不拘朝憲嘗
預宴遊苑不得醉而歸因詣道邊酒廬停車褰
帷與車前三騶對飲觀者如堵幾卿處之自若
上殿不下

吳賀琛遷尚書左丞并參禮儀事琛前後凡郊
廟諸議多所創定每見高祖與語常移晷刻省

中爲之語曰上殿不下有賀雅琛容止都雅故時人以此呼之

至門不開

北齊張耀爲尚書左丞文宣近出令耀居守文宣夜還耀不開門勒兵嚴備火至看面然後開迎文宣笑曰君欲學郅君章也賜以錦袍以其忠勤遂見親待

不置僕射

唐貞觀中宇文節爲尚書右丞明習法令以幹局見稱江夏王道宗嘗以私事託於節節遂奏之太宗大悅賜帛二百疋勞之曰朕不置左右僕射者正以卿在省耳

怒對宰相

顏真卿爲尚書左丞代宗車駕自陝府還真卿請先謁五陵孔廟而後還宮宰相元載謂真卿曰公所見雖美其如不合時宜何真卿怒而前曰用舍在相公言者何罪然朝廷事豈堪相公再破除邪載深銜之

奏求良田

隋楊汪爲兵部侍郎數年文帝謂諫議大夫王

達曰卿爲我覓一好左丞達遂私於汪曰我當
薦君爲左丞若事果當與良田爲報汪以達言
奏之達竟獲罪尋拜汪尚書汪明習法令果於
割斷時號稱職

劾競銀窟

隋郎茂爲尚書左丞時工部尚書宇文愷右翊
衛大將軍于仲文競河東銀窟茂奏劾愷位望
已隆祿賜優厚拔葵去織寂爾無聞求利下交
曾無愧色仲文大將軍近臣趨階庭朝夕聞
道虞芮之風抑而不慕分銖之利知而必爭何

以貽範庶僚示人軌物愷與仲文竟坐得罪

羨錦令製

崔思謙初拜右丞奏曰陛下爲官擇人非其人
則闕今不惜羨錦令臣製之比陛下知臣之深
亦微臣盡命之秋

挽弩自射

晉郤詵爲尚書左丞糾吏部尚書崔洪洪曰我
舉郤丞而還奏我此爲挽弩自射詵聞曰昔趙
宣子任韓厥爲司馬厥以軍法戮宣子之僕宣
子謂諸大夫可賀我矣崔侯爲國舉才我以才

見舉唯才是視各明至公何故斯言洪聞悅服

歷園按火

趙涓為監察御史時禁中失火火發處與東宮相近代宗疑之涓為巡使俾令即訊涓因歷孺園按據迹狀乃上直中官遺火所致也既奏代宗稱賞德宗時在東宮常感涓究理詳明及刺衢州年考既深與觀察使韓滉不相得滉奏免涓官德宗見名謂宰相曰豈非永泰初御史趙涓乎對曰然即日拜尚書左丞

當食批案

唐楊昉為左丞時字文化及子孫理資蔭朝廷以事隔兩朝且親族衆多為言左司未詳其案狀訴者以道理已成無復凝滯勃然通昉昉曰適朝退未食食畢當詳案訴者曰公云未食亦知天下有累年羈旅者乎昉命案立批之曰父殺隋主子訴隋資生者猶配遠方死者無宜更敘時人深賞之

短偃曲鈞

唐崔善為武德中歷尚書左丞甚得時譽諸曹惡其聽察因其身短而偃朝之曰崔子曲如鈞

隨例得封侯爵上全無項曾前別有頭高祖聞
勞勉之因購流言者加其罪

懦被擲器

晉王國寶因酒坐怒右丞祖台之攘袂呼喚以
盤盞樂器擲台之為有司所彈烈宗詔曰國寶
縱肆情性其不可長台之懦弱非監司體其免
官

古今文集

雜著

王右丞制

元厚之

朕循唐制復文昌府以令僕執國大政而丞為
之貳禮優秩峻茲謂輔臣具官某亮直清明有
猷有守服在禁近厥聞惟休茲用命爾以中大
夫正秩于右轄於戲庶習雖逸法艱為初凡厥
有官弗祗弗迪亦惟朕政未發于中其能允諧
時汝之任往服朕命厥惟懋哉

蒲左丞制

元厚之

同右丞某官問學才猷該洽通敏自朕識拔揚
于禁嚴是用命爾以中大夫正秩于左綱於戲
若昔大猷訓迪在位時朕忱汝協濟茲惟祗辟

可以肅列曹惟若德可以熙庶績圖休于永奠
尚懋哉

劉摯尚書右丞誥 蘇子由

漢御史大夫能任其職則爲丞相近世中執法
議論不撓亦補執政昔我仁宗優養正士開受
直言時則有若包拯張昇之流咸以敢言獲聞
大政舊俗已遠此風寂寥容悅相丞亦棄不用
朕追懷先正選建忠賢諤諤之聲庶幾前列具
官劉摯早以御史少事裕陵力陳是非不避權
寵十年流落志氣不衰召置臺端首開正論進

任中司之要屢開白簡之言風聲凜然國是以
定朕欲試其行事之實是用付以右轄之權治
忽所關寄任尤重夫以言責人甚易以義持已
實難爾其勉之母使輔政之功不若言事之效

謝除尚書右丞表 蘇子由

渙汗之恩已行而不反偃僂之志雖勤而莫伸
上愧鴻私下慙公議恭惟 皇帝陛下接堯舜
之統蹈成康之仁體貌先正耆老之臣揀拔後
來翹秀之士俛仰六載前後幾人坦然公明故
不私賢否之實穆然淵默故坐照情偽之真臨

御久則鑒愈明得失分則下無隱如臣者西南
賤士章句少儒早歲猖狂偶竊方聞之選中年
流落既安縣尹之卑遭時乏人致位近侍跌宕
文墨之囿嘖嘖議論之場舉皆空言安有實效
顧惟省轄之重實參國論之餘豈無遺賢遽及
微品地寒資淺何以望三事之餘光才短力罷
安能越六聯之滯論雖復勉就職愧歎何言
此蓋伏遇 皇帝陛下天地之仁曲成草木之
陋父母之愛不錄子弟之非將建大廈以覆群
生故收衆材而無棄物然臣負過其力受非所

容惟有潔已無私或不孤於托付引類自助幸
得免於顛躋不渝始終少答恩造

為樊左丞讓官表

臣某言伏奉今月二十八日制除臣尚書左丞
寵命俯臨慙顏自失泛大鯨之海但覺鳧搖載
巨鼈之山未如恩重臣聞尚書百揆翊亮萬機
故天上尊北斗中樞陛下有南宮左轄晉昇孔
坦諒直當時漢拜楊喬閑練故事庶得百僚有
憚於會府諸侯取法於京師臣實謏才謬登清
貫握蘭起草昔紊朝經剖竹頒條近貽人瘼備

歷中外無聞聲庸版圖再緝貢賦未均於九州
銅印更操威儀不檢於三署次郎補缺豈易其
人聖主求才宜難此受竊謂旁求俊乂側訪瓌
竒必使德合準繩言成網紀興化致理時無間
言况安上必在於薦賢危身莫踰於曠職儻蒙
垂收紫渙俯矜丹誠愚臣保陳力之言聖鑒有
責成之地無任覲冒惶悚之極謹詣朝堂奉表
陳讓以聞臣所讓人別狀封進

古詩

上韋左丞二十韻

杜甫

鳳曆軒轅紀龍飛四十春八荒開壽域一氣轉
洪鈞霖雨思賢佐丹青憶老臣應圖求駿馬驚
代得麒麟沙汰江河濁調和鼎鼐新韋賢初相
漢范叔已歸秦盛業今如此傳經固絕倫豫章
深出地滄海闊無津北斗司喉舌東方領縉紳
持衡留藻鑑聽履上星辰獨步才超古餘波德
照鄰聰明過管輅尺牘倒陳遵豈是池中物由
來席上珍廟堂知至理風俗盡還淳才傑俱登
用愚蒙但隱淪長卿多病久子夏索居貧回首
驅流俗生涯似衆人巫咸不可問鄒魯莫容身

感激時將晚蒼茫興有神為公歌此曲涕淚在衣巾

贈韋左丞文濟

杜甫

左轄頻虛位今年得舊儒相門韋氏在經術漢
臣頃時議歸前列天倫恨莫俱鵠原荒宿草鳳
沼接亨衢有客雖安命衰容豈壯夫家人憂几
杖甲子混泥塗不謂矜餘力還來謁大巫歲寒
仍顧遇日暮且踟躕老驥思千里飢鷹待一呼
君能微感激亦足慰榛蕪

參知政事

後魏古弼為尚書令參知政事**隋**

歷代沿革

蘇威高穎等參預朝政**唐****劉洎張**

文瓘皆參知政事魏徵杜淹等參預朝政崔仁師

等參知機務此其始也**宋**乾德二年太祖已相趙

普畏其專將擇官以為副而難其名稱召陶穀問

曰下丞相一等有何官對曰唐有參知機務參知

政事今可用之遂命薛居正呂餘慶為參知政事

仍令不押班不知印不升政事堂止令就宣徽使

廳上視事殿庭別設埽位於宰相後勅尾書銜降

宰相數字月俸雜給半之蓋帝意未欲令居正等名

與普齊也

會要。史臣錢若水等曰按唐高

宗嘗欲用郭時舉參知政事復以其資淺止
令同承受平章事亞於參政矣穀言失之開

寶六年詔參政薛居正等於都堂與宰相同
議公事又詔中書門下押班知印宜令與居
正等同知雍熙四年御史言文德殿常朝百
官皆有搏位唯參知政事未有詔令依位排
砌至道元年詔參政與宰相分日知印押正
衙其搏位先異宜合為一並得升都堂二年
詔自今參知政事不知印押班搏位列宰相

後不升政事堂然押勅齊衙行並馬至今不
易參政行丞相事多不踰年淳熙初葉夢錫
龔實之行丞相近三年言者以為懷私嘉泰
許深甫為參政命陳勉之兼權又除袁起巖
蓋三負也嘉定初命雷季仲婁彥發樓大防
亦三負遂為故事大元尚書省置參知政事
二人為宰相之貳佐治省事

羣書要語

參聞政本職重端副唐李靖制宜
緝台階之政唐崔日用制燮贊化

原參知鼎實

柳子厚代謝表擢參相府貳秩台

衡楊億謝表須陪議於宰涂賜曾公亮批豫大

政於萬機下丞相之一等實錄贊貳國鈞參圖

廟論歐陽集黃樞貳職侍講金華紫府引真參

謀玉鉉陳希烈制參聞政道陪貳宰司賜曾公

亮批

詩句疾風知勁草板蕩識誠臣太宗賜蕭瑀

古今事實

崔湜文詞

唐崔湜初執政也年二十七容止端雅文詞清
懸嘗暮出端門下天津馬上自吟曰春還上林

苑花滿洛陽城張燕公時為工部侍郎望之杳

然而歎曰此句可效位可得其年不可及也翰

林盛事本傳

戴胄忠直

唐戴胄為尚書參預朝政太宗嘗謂群臣戴胄
於我無骨肉之親其實忠直厲行情深體國

諭除銀鈞

隋蘇威與高穎參掌朝政威見官中以銀為幔

鈞因盛陳節儉之美以諭上上為改容彫飾舊

物悉命除毀本傳

解賜佩刀

唐魏徵知門下省事詔朝章國典參議得失他日宴群臣帝曰納忠諫正朕違為國家長利徵而已雖有古名臣亦何以加親解佩刀以賜本傳

貢金不受

褚遂良進黃門侍郎參綜朝政莫離支貢金遂良曰討弒君之罪不受其賂分紀

進爵以酬

唐戴胄為吏部尚書參預朝政太宗嘗謂群臣戴胄於我無骨肉之親但其忠直厲行情深體

國事有機要無不以聞所進官爵以酬厥勞爾本傳

蹈履仁義

魏證與杜淹等以秘書監參預朝政上問徵與諸葛亮孰賢云云帝曰徵蹈履仁義以弼朕躬致之堯舜雖亮無以抗本傳

勸行仁義

魏證字元成正觀三年以秘書監參預朝政於是帝即位四年天下大治蠻夷君長襲衣冠帶刀宿衛東薄海南踰嶺戶闔不閉行旅不齎糧

取給於道帝謂群臣曰此徵勸我行仁義既効矣本傳

參掌機密

魏文帝即位劉放孫資轉為左右丞參掌機密評曰劉放文翰孫資勤謹並管喉舌權聞當時三國志

輔贊聖德

施大資點字聖與自除簽書未一日即參大政總軍國之務者凡六載所建明為多尤以翰忠切諫輔贊聖德為心言行錄

守道耿介

唐蕭瑀復參預朝政帝曰武德季太上皇有廢立議瑀於爾時不以利怵死懼社稷之臣也因賜詩曰疾風知勁草版蕩識誠臣又曰公守道耿介古無以過然善惡太明或有時而失瑀頓首謝曰既蒙教又許以忠亮雖死日猶生年也本傳

風範端凝

李沆嘗侍曲宴太宗自送之曰李沆風範端凝真貴人也俄除參知政事職源

剛毅守節

薛簡肅公奎字宿藝拜參知政事公入謝上曰先帝嘗言卿可用吾今用卿矣公感激自勵而素剛毅守節不苟合既與政尤挺立無所牽隨言行錄

剛正立朝

魯肅簡公立朝剛正嫉惡少容在政府七年務裁抑僥倖不以名器私人同上

稱為五貴

隋蘇威宇文述裴矩裴蘊虞世基參掌朝政時

人稱為五貴 蘇威傳

不直一錢

李昉素與盧多遜善待之不疑多遜知政事諧昉於上前人有言於昉曰盧與我厚不當爾後盧敗昉知政事及盧事昉頗為揮解之上因言曰盧多遜常毀卿不直一錢昉乃信上由此益重昉常目之為善人

真宰相才

寇萊公準召為參知政事嘗奏事切直太宗怒起輒攀帝衣復坐事決乃退太宗曰此真宰相

材也 太宗實錄

真台輔器

趙公普為相呂端為參政嘗語人曰吾觀呂公奏事得嘉賞未嘗喜遇抑挫未嘗懼亦不形於色真台輔之器也

中書總目

歐陽文忠公脩字永叔公在政府凡兵民官吏財利之要中書所當知者集為總目遇事不復求之有司公與韓公同心輔政每議事心所未可必力爭韓公亦開懷不疑故嘉祐之政世多以為得言行錄

天章條事

范文正公仲淹字希文為參知政事每進見上以太平責之既而再賜手詔趣使條天下事又開天章閣召見賜坐授以紙筆使疏於前公退而條列所宜先者十數事上之言行錄又宋元憲公庠帝召二府天章閣觀書上出詔目問天下利病事公時參知政事獨進曰臣等願至中書條上既退草數千言奏之後皆施用同上

兼權密院

趙忠簡公鼎字元鎮宰執奏事上詔孟庾沈與
求並兼樞密趙鼎曰仁宗陝西用兵宰臣兼
樞密今臣既兼而參與亦令兼權則事歸一體
無前人所謂密院調兵而三省不知三省財竭
而密院用兵不止者矣言行錄

同議邊事

紹興四年六月臣僚言仁宗皇帝康定初陝西
用兵知樞密院晏殊言近詔邊事宰臣參議而
參知政事獨不與聞乞自今並許同議仍令書
檢帝曰議政之臣所當同國休戚詔皆從之望
檢會康定故事應密院邊事之大者詔參知政
事同議仍書檢詔依見行條例仍自今三省官
通書檢中興會要

面議政事

趙清獻公抃字閱道參知政事感激思奮面議
政事有不盡者輒密啓聞上手詔嘉之公與富
弼曾公亮唐介同心輔政率以公議為主言行錄

前陳利害

王文忠公堯臣字伯庸在政事堂議論有所不
同必反復切劘至於是而後止不爲獨見在上

前所陳利害甚多 言行錄

前辯是非

唐質肅公介拜參知政事與同列論政事未嘗阿屈雖在帝前必究功辯析要是非之歸帝以是益敬信之而天下翕然想望其風采一日語諸子曰吾備位政府知無不言桃李固未嘗為汝等栽培而荆棘則甚多矣

論禁朋黨

慶曆四年上與執政論及朋黨事參政范仲淹對曰自古以來邪正在朝未嘗不各為黨不可

禁也在聖鑒辨之耳誠使君子相朋為善其於國家何害 悚水記聞

令薦人材

趙忠簡公鼎在洪二年召還除參知政事上令鼎薦人材公即以朱震范同呂祉陳橐呂本中林季仲薰茶上之 言行錄

面折賈琰

竇偁與賈琰同事太宗府中太宗嘗與諸王府射琰稱贊而多矯誕偁叱之太宗不樂因罷會白太祖出偁陞州後為參知政事太宗謂曰卿

何以至此曰陛下以藩邸舊恩至此太宗曰非也卿嘗面折賈琰賞卿之直耳

職源

頭歐劉樹

後魏古弼太武時為尚書令參知政事方欲奏除滅苑囿遇太武與劉樹圍棊弼捽樹頭歐其背大武竒弼公直皆可其奏以與百姓通鑑

取法韓歐

周益國文忠公必大除參知政事上曰近見卿遇事殊不依違執政之於宰相事任非遠自當和而不同公曰韓琦歐陽脩殿上日有所爭退

則權然無間最為可法

言行錄

勞曰裴度

慶曆中貝州兵士王則反明鎬師久無功參知政事文彥博請行上欣然委之凱旋除平章事及見上勞之曰卿朕之裴度也

職源

太平宰輔

王文正參預朝政一日便殿論邊事退文正歎曰何日邊候徹警使吾輩得為太平宰輔李文靖公不答至中書召文正語之唯聖人能內外無患自非聖人外寧必有內憂譬言人有疾常在

目前則知憂而治之言行錄

清優學士

孫夢得為參知政事曰俸祿差厚爾與學士亦不甚相遠但清優不如學士而勞責過之

東齋記事

自節度除

丁謂自保信軍節度使知江寧召為參知政事以當降麻盛文肅為學士以為參知政事合用舍人草制遂以制除丁甚銜之倦遊錄

與相職均

張方平除參政制曰參議大政雖下丞相一等

至於坐斷廟堂之論上則幹元化以調四時下則營至仁以澤萬類近則群元仰首以承德遠則殊俗交臂以待命蓋與宰相之職業均

丁朱

一負押麻

凡鎖院文臣職事官承務郎釐務官通直郎以上明日赴文德殿聽麻宰相樞密皆不往惟輪參政一負押麻麻卷自內出閣門啓御封兩吏對展宣贊舍人南面搢笏叉手摘首尾詞及階官以授參政參政付中書吏百官不拜而退若大詔令及冊后之類則宰相文武百僚俱入

淳

輪日知印

至道元年詔自今參知政事宜與宰相輪日知印押正衙其位埒先異位宜合為一商議軍國政事並得升都堂閏七月衝改會要

乘傳赴闕

淳化四年知大名府趙昌言乘傳赴闕拜給事中參知政事即日赴中書視事長編

轉官加階

王冀公以參知政事判大名府召還加邑封契

丹方講好真宗欲重其事冀公入謝特命以衣帶鞍馬賜之自後二府轉官加階勲封邑入謝皆有對賜分紀

虜喜得人

薛簡肅公奎拜參知政事公嘗使契丹議論服其坐中及聞公用皆喜曰是得人矣六一文

行且相卿

契丹謀入寇畢文簡公士安首疏五事帝多納用中書闕相乃進公參知政事帝曰未也行且相卿言行錄

魚頭公

魯肅簡公參大政樞密使曹利用恃權驕橫公屢折之帝前時貴戚用事者莫不憚之目為魚頭參政因其性且言骨鯁如魚頭也同上

骰子選

丁謂作參政或率楊文公賀之公曰骰子選耳何足道哉東齋筆記

魏證批鱗

魏證參預朝政帝曰人言徵舉動疏慢我見其嫵媚耳對曰陛下導臣使言臣不敢數批逆鱗

哉本傳

丁謂拂鬚

丁謂參知政事嘗會食於中書有羹汚中書寇準鬚謂與拂之準曰君為參預大臣而與官長拂鬚耶謂顧左右深愧恨之

召母賜坐

賈黃中兩受詔知貢舉多揀拔寒俊號為無私又掌吏部選事品藻精當上益知其才拜給事中參知政事召見其母王氏賜坐與語曰教子如此真所謂今之孟母也因賦詩以美之賜予

甚厚 事畧

加父優恩

參知政事父見其進拜者盧朱崖吳正肅與尚書張公安道樞副陳堯叟張文孝旻文肅田登用而朝廷多優加其父恩命焉春明退朝錄

不交一談

張洎為給事中參知政事與寇準同列先準知吏部選事洎掌考功為吏部官屬準年少新進氣銳思欲老儒附以自大洎夙夜坐曹每冠帶候準於省門揖而退不交一談準益重之後既

同秉大政準亦忌之洎奉事準愈謹政事一決於準無所參預

不曉一句

張洎為參知政事嘗越次奏曰呂端等備位廊廟上有所詢問乃默然不言深失訐謨之體端曰洎雖有所言皆不過佯揣陛下意耳上默然明日洎上疏徵賈捐之棄珠崖事願棄靈武以省關隴餉餽上初有意既而悔之覽奏不悅却以付洎謂曰卿所謂朕不曉一句洎皇恐流汗而退

同議都堂

會要開寶六年六月詔參政薛居正呂餘慶於都堂與宰相趙普同議公事

坐退思巖

魯宗道為執政營一小室畫山水朝退獨坐謂之退思巖雖妻子亦不許入國老閑談

古今文集

雜著

蔡參政制

元厚之

勅卿輔之任為朕股肱惟高謀博識可以濟太

平之功惟同德一心可以成天下之務唐嘗遴選尤謂才難具官某學足以造微智足以適變向繇禁近遂長憲臺繩愆糾繆而多所贊襄指佞彈邪而無所迴隱維持大法以尊君愛國為心排沮異端以陳紀立經為務詢求列位爾實忠嘉斷自朕心進參大政夫惟以公滅私則無朋淫之毀以忠事上則有輔德之休祗服訓辭往欽朕命可特授

章參政制

元厚之

勅朕若稽古正名于百工惟門下二品副侍中

之職與聞國論實左右予具官某稟資雋明通
達治體嘗陪宰府出殿帥藩今茲命爾躋秩于
東省爾其念哉民之利病在賦政政之臧否在
官人官非其人政或失當出納自爾往惟欽哉

讓知政事表

李嶠

有命自天光寵踰量如集于木啓處失圖

中謝

臣聞簡賢任能百揆所以時叙謬官失職九流
於是咸曠隆替所寄義不可輕臣才實凡庸志
無遠大叨預簪纓遂升臺閣踐金門而遊石室
掌狐史而參鳳綸被蜉蝣之衣徒切榮寵接鴛

鷺之羽久慙尸曠甘受妨賢之責忽承非次之
恩廼使參預機衡獻替帷幄持濟巨之舟楫味
和羹之醯醢以挈瓶之智陪負鼎之遊將何以
祇奉帝帷弼亮皇極况丹青所運鼓舞通於四
時鑪錘所裁網紀行於方俗動關政體豈易其
人臣才缺行踈藝殫術淺同子房之多病異吳
漢之強力策支離之杖未振其軀資擁腫之材
豈勝其任將恐貽災傾餽取辱敗軍喪實虧名
夫豈足惜害公撓法茲焉是懼敢緣陳力之義
輕布由衷之請伏冀九霄垂澤三舍迴光體臣

不移之愚矜臣難奪之志特停過謬改命才賢
則器滿之凶不累於凡鄙棟隆之吉永光於聖
代

辭免參知政事表 歐陽修

職參論道宜極選於一時授匪其人實駭聞於
衆聽恩命所被跼踖難安中謝伏念臣本乏材
能徒緣幸會列于侍從白首無聞置在樞機
素飡已甚雖聖主之恩天地曲示含容而朝廷
之事毫釐動關利害豈止曠官之誚每懷誤國
之憂矧惟政事之臣實代天工之任俾之贊貳
宜擇材賢伏望 皇帝陛下收誤獎之恩廣
僉諧之訪憫疲駕之已試備見無庸求俊又以
在廷擢之不次俾或安於舊職冀免速於罪辜
報效之誠殞糜後已

謝除參知政事表 歐陽脩

贊貳國鈞參聞妙論謂宜不次之選冀得非常
之材乃以叙遷比之承乏誤恩過被訴讓靡從
中謝伏念臣少迫賤貧偶勤學問儒者博而寡
要况匪多聞文章世之空言豈能適用徒以早
邁亨嘉之會驟蒙獎擢之私叨言語侍從之流

逮今踰紀玷出納樞機之任初乏可稱幸先殫
理之未加每欲逡巡而忍去敢期睿眷俾與政
機優以寵章進其爵秩望非意及榮與憂并此
蓋伏遇 皇帝陛下堯德聰明禹躬勤儉博求
俊乂以濟治康謂臣既樸且愚必能循於忠謹
雖庸而懦尚可策其疲駑猥以備負遂茲冒寵
敢不益堅素守自勉不強惟殫犬馬之勞上答
乾坤之造

辭免參知政事劄子

樓鑰

承命下臨撫躬增惕竊以中書之本萬化固資
參預之良近弼之有二臣足稱倚毗之重敢言
推擇誤及凡庸伏念臣游黜從班叨塵宥府才
再周於月館已疊被於恩綸玩愒自慙於事功
而何補衰疲既甚况疾病之復侵方將俟使介
之旋便請掛衣冠而退忽驚寵渥俾與政機載
攷舊章間有三人之同列若稽近比未聞兩地
之贅負伏望 皇帝陛下俯察由衷曲怜過分
收還成渥願亟賜於俞音茂柬英才以共扶於
輿運

辭免參知政事表

樓鑰

進參政柄誠出誤恩冒貢遜函未回淵聽浡布
懇祈之切敢辭俯偃之恭中謝伏念臣才不逮
中身今既老十載排根之已甚實倍費於保全
一朝收召而復還又屢叨於褒擢非敢忘知止
之義蓋欲堅圖報之心今則疾疢交侵徒強顏
而自覲年齡云邁顧納祿之未能使在旬月之
間稍有毫釐之補序遷而上已分已逾而况據
案牘而書名雖具負而何益對冕旒而奏事無
長策之可陳誤寵所加群言必駭伏望
皇帝陛下念經綸之事重恩輔贊之才難別選

英毫俾作調元之助母容衰瘁更貽濫吹之譏
或畀舊班俯存孤迹

謝除參知政事表 樓鑰

充貳樞庭方慙玩愒晉陪宰路遽被推遷倍深
臨谷之危莫遂循墻之請中謝竊以朝廷建輔
號天子之四鄰政事參聞下丞相之一等定名
稱於乾德復官制於建炎必求異能乃副隆委
伏念臣頽齡景迫壯志日凋再掌吏銓但守停
年之格濫居宥府未寬思職之憂雖粗竭於謏
才終莫裨於末議負二宜去有七弗堪宿恙漸

侵將顛天而致禱誤恩狎至真踏地以靡遑况
秉鈞當軸之虛負而知印押班之分日兼與漢
章之約仍從商皓之游命服匪頒復賜天閑之
駿爰田增衍更開公社之封昔在本兵尚為僥
冒茲叨助理尤懼曠瘼茲蓋伏遇 皇帝陛下
盛德又新至誠樂與折衝禦侮坐底於外寧聚
精會神力先於內治柬求俊乂寘在弼諧肆令
衰退之蹤亦忝延登之數臣敢不益殫愚慮仰
贊宏規曰都曰俞願竊慕賡歌之喜知足知止
庶幾從告老之私

上曾參政書

臨溪

某聞古之君子立而相天下必因其材力之所
宜形勢之所安而役使之故人得盡其材而樂
出乎其時合也某材不足以任劇而又多病不
敢自蔽而數以聞執事矣而閣下必欲使之察
一道之吏而寄之以刑獄之事非所謂因其材
力之所宜也某親老矣有上氣之疾日久比年
加之風眩勢不可以去左右閣下必欲使之奔
走跋涉不常乎親之側非所謂因其形勢之所
安也伏惟閣下由君子之道以相天下故某得

布其私焉論者或以爲事君使之左則左使之
右則右害有至於死而不敢避勞有至於病而
不敢辭者人臣之義也某竊以爲不然上之使
人也既因其材力之所宜形勢之所安則使之
左而左使之右而右可也上之使人也不因其
材力之所宜形勢之所安上將無以報吾君下
將無以慰吾親然且左右惟所使則是無義無
命而苟悅之爲可也害有至於死而不敢避者
義無所避之也勞有至於病而不敢辭者義無
所辭之也今天下之吏其材可以備一道之使
而無不可爲之勢其志又欲得此以有爲者蓋
不可勝數則某之事非所謂不可辭之地而不
可避之時也論者又以爲人臣之事其君與人
子之事其親其勢不可得而兼也其材不足以
任事而勢不可以去親之左右則致爲臣而養
可也某又竊以爲不然古之民也有常產矣然
而事親者猶將輕其志重其祿所以爲養今也
仕則有常祿而居則無常產而特將輕去其所
以爲養非所謂爲人子事親之義也其某之材
固不足以任使事矣然尚有可任者在吾君與

吾相處之而已爾固不可以去親之左右矣然
任豈有不便於養者乎在吾君與吾相處之而
已爾然以某之賤未嘗得比於門墻之側而慨
然以鄙樸之辭自通於閣下之前欲得其所求
自常人觀之宜其終齟齬而無所合也自君子
觀之由君子之道以相天下則宜不爲遠近易
慮而不以親踈改施如天之無不燾而施之各
以其命之所宜如地之無不載而生之各以其
性之所有彼常人之心區區好伎而自私不怨
已以及物者豈足以量之邪伏惟閣下垂聽而
念焉使天下士無復思古之君子而樂出乎閣
下之時而又使常人之觀閣下者不能量也豈
非君子之所願而樂者乎冒黷威尊不任惶恐
之至

與鄭參政劄

朱晦庵

山野伉拙處世不諧然自少日即蒙當世一二
鉅公教誨期許待以國士居常厲志不敢少貶
以辱其門亦庶幾得因濟會少有毫髮以自效
於當世不意莫年此志不遂而又適遭時論大
變威福下移忠賢奔波海內震駭病中聞之憤

悶鬱結覓死無路亟欲草疏自通幾或開悟而子弟諸生交謁更諫以為如此適增國家之累而無益紛拏累日疾勢遂侵此乃窮命使然亦無足言者今若得以因病辭官并脫無名之職則與世長辭含笑入地無所恨矣伏惟參政矜憐有素切望乘此機會曲賜保全萬一更有纏撓不遂所懷則熹素心尚在本未能平一旦遇事感觸不能自己更以垂死之年自貽投竄之禍亦非參政之所欲也抑時事如此有識寒心而參政從容其間未肯身任其責此亦中外所深疑者而熹猶竊恐高明之有待而發也不知其果然邪其不然邪如其果然則安危之機相去日遠亦不可以少緩矣垂絕之言無復倫次唯此一念炳然如丹伏惟明公念之

詩話

作釣魚詩

見前參政類

新編古今事文類聚卷之八

新集

新編古今事文類聚卷之九

新集

南江富大用時可編

省屬部

左右司

郎中

員外郎

歷代沿革

隋煬帝三年尚書都司始置左右司郎各一人品同諸曹郎從五品

掌都省之職唐武德初省正觀初復置改為

郎中龍朔二年改為左右承務咸亨中復舊

名掌副左右丞所轄諸司事天后永昌元年

復增置左右司員外郎各一人神龍初省後復置宋朝以為階官元豐正名始實有職掌左右司郎中各一人員外郎各一人凡四員掌舉諸司之綱紀號為都司亦曰左右曹元豐六年都司置御史房主行彈劾御史按察失職七年御史房置簿以書御史六曹官糾劾之多寡當否為殿最紹聖初詔都司以歲終點檢六曹稽違太多者其姓名取旨二年詔御史臺察六曹稽緩違失者送左司記定建炎三年以置檢正省左右司二員明年復

隆興元年詔左右司郎官各差一員減罷二員二年詔左司書擬吏戶禮機速房右司書擬兵刑工賞功房文字後以右司掌刑房事任為劇乃置二員大元左司掌總察吏戶禮三部受事付事右司掌總察兵刑工三部受事付事各置郎中員外郎都事其屬有祇候郎君架閣庫管勾同管勾等人

羣書要語

三公天子之股肱掾屬三公之喉舌漢崔寔傳二十四司呼左右司

為都公唐書董正六曹

彌淪省闥

紀綱百

司 左右司掌受付六曹之事而舉正文書之

稽失 四朝志 舉稽違署符目知宿直為丞之貳

六典 掌舉諸司之綱紀與百寮之程式以正邦

理以宣邦教 同上 位膺列宿爵綰通班總八座

之繁司承萬幾之要務鏘鏘會府掌北斗之璣

衡肅肅禮闈握南宮之樞奧 張鶻劾許鑑文尚

書政本左右司綱紀之地故郎選異於諸曹 南

豐擬制 都司分治六官事無巨細畢陳于前若

網在綱振之則舉弛之則廢 樂城除孫覺制中

臺都司主以郎吏非獨付受書奏亦以助正紀

綱除張康國等制 升冠都司之右 趙及制 都司

紀綱之地非習知臺閣故事不在茲選 同上 參

訂左曹 參訂右曹 同上

古今事實

毗佐助鼎

太尉司徒司空長史秩比千石號為毗佐三台

助鼎和味 應邵漢官儀

台佐加貂

褚球字仲寶為司徒右長史加貂佐加貂始自

球 南史

玄冕黻裳

隋煬帝始置左右司郎各一人宋因改曰郎中服章與諸司郎中並同玄冕五旒衣無章裳刺黻一章兩梁冠

玄纓纁裳

天后永昌元年始置左右司員外郎各一人時顧琮自侍御史除元懷真以洛州司戶遷其朝服與諸司員外郎並爵弁玄纓簪導青衣纁裳一梁冠

以文辭薦

白敏中字用晦為左司員外郎武宗雅聞白居易名欲召用之是時居易病足宰相李德裕薦敏中文辭類其兄而有器識

以詳整稱

武元衡字伯蒼遷左司郎中詳整任職時以詳整稱重

勵志獨立

隋骨儀為右司郎中于時政漸濁亂貨賂公行士夫變節而儀勵志守常介然獨立

隋書

草疏極言

張拭字敬夫除右司員外郎知閣門事張說除
簽書拭夜草手疏極言其不可且詣宰相質責
之宰相慙憤不堪而上獨不以為忤親札疏尾
付宰相使諭旨拭復奏上意感悟命得中寢
誠齋集

精簡得人

太宗朝劉洎上疏曰尚書萬機乃為政本此者
網維不舉並為勲親在位品非其任功勢相傾
將救茲弊且宜精簡四員左右丞左右司郎中
如並得人自然網維一舉亦當矯正趨競豈惟

息其稽滯哉

唐書

掄選有序

吳王潛為左司郎中典選事時喪亂之後官失
其守甲簿湮沒潛雍容款接坐客常滿隨才而
接人人自以為得徐知誥相吳掄選有序潛之
力也

九國志

公廳決事

劉摯傳摯遷右司郎中初宰掾每於執政分廳
時請間白事多持兩端伺意旨摯始請以公禮
聚見共決可否

都堂坐白

張維字振綱留爲左司郎中遇事有未便輒詣都堂坐白或基曰瑣瑣辨切非朝官體公曰都司助調鼎實幾微所關若視吏籤擬輒涉筆書不置可否安用我輩邪

晦菴集

沮大臣議

倪濤字巨濟遷左司員外郎朝廷議有事燕雲大臣爭先決策爲固位計濤獨曰天下久平士不習戰軍儲又屈無輕議以貽後患宰相王黼怒曰左司敢沮軍邪罷之

東都事畧本傳

宣都司力

葉顥除右司時孝宗初即位欲清中書之務增宰士之員公膺首選遷左司一日帝召諫官曰葉顥在都司二年甚宣力然與宰相為朋黨諫官對曰臣不識葉顥聞之公論不然因其陳求外補意帝默然良久曰非卿則朕無以知此人越翌日除吏部侍郎兼權給事中

揚誠齋集

書數曾布

陳瓘爲右司員外郎以書獻曾布曰尊私史而壓宗廟緣邊費而壞先政皆閣下之過也布讀

之大怒辨論移時權指事敘言辭色不撓堂吏
比肩竦觀又以日錄辨國用須知繳申三省遂
出知秦州 丁未錄

面折願浩

紹興三年時方審量濫賞以左右司領之呂頤
浩當國時有縱舍右司員外郎王岡輒持不可
曰公秉國鈞於天下具瞻之地不平謂何怨始
有所歸矣願浩矍然 中興系年錄

出使除職

元豐六年七月左司郎中范雍直龍圖閣河北

轉運使都司出使除職自此始元祐元年范子
竒范純夫自左右司出為河北京東轉運皆用
雍例直龍圖閣 長編

被劾失職

許鑑為左司郎中不稱職張鶯劾之云位膺
列宿爵綰通班總八座之繁司承萬機之要
務 唐書

自書除目

王震字子發元豐四年開天章閣初用官制大
除拜詔震與吳雍從輔臣執筆入記聖語面授

右司員外郎直使自書除目時論榮之哲宗實錄本傳

學為宰相

紹興十三年三省擬進右司郎中上謂輔臣曰神宗聖訓云左右司便是學為宰相豈可不謹擇會要

都事

歷代沿革

本尚書都令史之職令史蓋前漢官也漢尚書臺令史秩二百石魏

令史皆八品晉尚書都令史八人秩二百石與左右丞總知都臺事宋齊八人梁陳五人品並第八隋開皇初改都令史為都事置八人正八品上唐置六人從七品上自晉宋齊後魏北齊隋置八者當八座之數梁陳置五者當五曹之數唐置六者當六曹之數宋尚書省都事正八品大元於左右二司各置都事亦古制也

古今事實

絳服賢冠

都令史絳朝服進賢二梁冠官品第八廩月八

斗晉百官表注

朱衣執板

自魏晉宋齊正令史書令史皆有品秩朱衣執

板進賢二梁冠齊職儀

判事側坐

尚書郎判事正坐都令史側坐書令史過事北

齊故事

在任專學

虞溥字允元為偏將軍領兵備隴西在任專學

以郎中補尚書都令史

有國士風


趙孟字長舒補尚書都令史善於清談有國士
之風其面有疵黯諸事不決皆言當問疵面

言古葬地

太康六年尚書郎令史王銓上言古葬必於不
食之地不妨民令率士之臣各附京邑求墓地
廣種松柏臣恐數十年後民稀松柏相望非永
安之制


皇朝文獻通考卷九

九



新編古今事文類聚卷之九

新集



4
2
90

東洋圖書印

東洋圖書印			
一	二	三	類書門
三〇	八〇	加	類書
冊	號	架函	類

事類聚新集

十之十

八

不許帶出

新編古今事文類聚卷之十

新集

南江富大用時可編

六曹部

淺草文庫

總尚書

歷代沿革

尚書古官也周為內史周禮司會
 中大夫二人戰國時有尚冠尚衣
 之屬秦世少府遣吏四人在殿中主發書謂
 之尚書漢初有尚冠尚衣尚食尚浴尚席尚
 書謂之六尚武帝遊宴後庭始用宦者主中

書以司馬遷爲之遂罷其官以爲中書之職
成帝建始四年罷中書宦者又置尚書五人
一人爲僕射而四人分爲四曹通掌圖書祕
記章奏之事各有其任一曰常侍曹主丞相
御史公卿事二曰二千石曹主刺史郡國事
三曰民曹主吏民上書事四曰主客曹主外
國夷狄事後又置三公曹主歲盡考課諸州郡事
後漢光武以三公曹主歲盡考課諸州郡事
改常侍曹爲吏部曹主選舉祠祀事民曹主
繕修工作監池園苑事客曹主護駕羗胡朝
賀事二千石曹主辭訟事中都官曹主水火
盜賊事合爲六曹是時尚書雖有曹名不以
爲號靈帝以侍中梁鵠爲選部尚書於此始
見曹名**魏**改選部爲吏部又有吏部左民客
曹五兵度支凡五曹**晉**置吏部三公客曹駕
部屯田度支爲六曹而無五兵及渡江有吏
部祠部五兵左民度支五尚書**宋****齊****梁**各有
六尚書又有起部尚書起部不常興立宮廟
則權置事畢省**陳**承梁置尚書五員**後魏**分
尚書三十六曹曹置代人令史譯令史書令

史各一人隋改為六部尚書分司曹務直宿
禁省如漢之制唐因隋制六典建官龍翔二
年改尚書為太常伯咸亨元年依舊宋初監
藩鎮之弊以尚書郎曹出領外寄熙寧詔新
官制以六曹尚書侍郎為長貳元祐置權尚
書大元因唐宋舊置六部各以尚書為之長

羣書要語

帝曰龍朕聖讒說殄行震驚朕師
命汝作納言夙夜出納朕命惟允

尚書唯仲山甫王之喉舌詩士之權貴不過尚
書漢官解詁尚上也言最在上總領之也釋名

尚猶奉也百官言事當有案平處奏之故曰尚
書同上尚書萬事之本朕所責成也而廩秩儉
薄甚非治體康帝起居注漢明帝詔尚書蓋古
之納言出納朕命機事不密則害成可不謹歟
漢官儀天下樞要在於尚書韋處傳太宗謂戴
胄曰尚書總國網維失一事天下有受其弊者
戴胄傳漢置五曹今分六尚近喻喉舌遠譬斗
樞隋江總表出納王命敷奏萬機蓋政令之所
由宣選舉之所由定斯乃文昌天府隋百官志
文昌政本司會要經况其五曹斯納百揆南史

八座之任非賢莫居恭謨疏臣聞尚書百揆翊

亮萬機故天上尊北斗中樞陛下有文昌左轄

柳子厚遜官表尚書職在機衡宮禁嚴密後郎

顛傳入作納言光輝紫極韋誕集影組文昌升

簪清覽傳儀制獻善宣美楊雄箴綜事分務發

揮政源魏志王肅云

詩句尚書北斗尊顏真卿集持衡留藻鑑聽履

上星辰杜甫北斗司喉舌東方領縉紳赤管

隨王命尚書踐台斗並同上尚書總庶事官

人承法憲魏應據詩解組便歸閑處士折花莫

笑病尚書歐公朝罷人人識鄭崇直聲如在履

聲中東坡上方行賜尚書馬路人不識呼尚書

但見凜凜雄千夫我如懷祖拙自謀正作尚書

已過優並同上王述字懷祖與羲之齊名而羲

之輕之尚書氣與秋天杳杜

古今事實

猶天喉舌

李固疏曰陛下有尚書猶天之北斗北斗為天

喉舌尚書陛下之喉舌李固傳

擢任喉舌

後漢左雄虞詡上疏薦之曰雄有王臣蹇蹇之節宜擢任喉舌之官必有弼正之益由是拜尚書

試對第一

後漢翟酺時尚書有闕詔將大夫以上試對政事第一天文道術以第一者補之由是酺對第一拜尚書焉本傳

早拜見重

蔡景歷拜度支尚書舊式拜官在日午後景歷拜日適逢駕幸玄武觀在位皆侍宴帝恐景歷不預特令早拜其見重如此

委以老成

晉山濤轉尚書表辭年老詔曰方今多事嘉謀良圖委以老成

帝喜得人

梁明少遊知名之士位都官尚書簡文帝謂人曰我不喜明少遊作尚書喜朝廷得人南史

典定舊制

伏湛字惠公拜尚書典定舊制表崧漢書

閑練舊典

李固薦楊淮閑練舊典且有幹用宜在機密特拜尚書益部耆舊傳

明習舊事

王博拜尚書明敏習漢家舊事分紀

明習故事

侯霸光武時拜尚書時無典故事朝廷又少近臣霸明習故事每春下寬大之書奉四時之令皆霸所建

典樞機

韋彪上疏曰欲急世所務當先除其患源在

尚書典樞機天下事一決之不可私也華晉後漢書

典樞機

尚書唐虞官也龍作納言詩云仲山甫王之喉舌秦改稱尚書漢亦尊此官典機密也漢官儀即古六卿

魏世事統臺閣重內輕外故八座尚書即古六卿之任也衛盧久居斯位不忝厥職魏志

制法九品

陳羣為尚書制九品為官人之法同上

謹言正直

朱穆為尚書謹言正直謝承後漢書

方毅廉貞

黃琬方毅廉貞為尚書續漢書

魏朗蹇諤

魏朗字少英入為尚書再升紫薇蹇諤禁省不

屈豪右謝承後漢書

荀緄寬敏

荀緄字伯條拜尚書緄性明寬敏於眾職以厲群僚秉機平正直道而行是時内外公卿大夫

莫不敬憚同上

宜擇温厚

高馮正觀初上五事曰如尚書八座人之所責

成者也宜擇温厚修潔者任之尚朴素革浮偽

使家識老慈人知廉恥自然禮節興矣本傳

妙選德望

唐元宗欲用牛仙客為尚書張九齡諫曰不可

尚書古之納言有唐以來多用舊相居之不然

歷踐内外清貴之地妙選有德望者充之仙客

本河湟一使典耳拔升清流齒班常伯此官邪

也通鑑

舉觴見屬

後魏肅宗舉觴爲羣臣曰袁尚書朕之杜預故以杯屬元凱侍坐者莫不仰羨北史

上疏薦拜

後左雄虞詡上疏薦之曰雄有王臣蹇蹇之節宜擢任喉舌之官由是拜尚書

佩刀簪筆

尚書佩契刀囊執板加簪筆焉袁子正書又周捨問劉杳尚書官著紫荷相傳云挈囊竟何所

出荅云張安世傳云囊簪筆事武帝數十年注云囊橐也近臣簪筆以待顧問南史

班詔賜珠

顯宗拜鍾離意爲尚書時交趾太守張恢坐藏千金徵還伏法以資物簿入大司農詔班賜羣臣意得珠璣悉以委地而不拜賜帝怪而問其故對曰孔子忍渴於盜泉之水曾子回車於勝母之門惡其名也此賊穢之寶誠不敢拜帝嗟歎曰清乎尚書之言乃更以庫錢三十萬賜意轉爲尚書僕射後本傳

鄭崇履聲

前漢鄭崇字子游為尚書僕射數諫諍上納用之每見曳革履上笑曰我識鄭尚書履聲本傳

杜預武庫

杜預為尚書損益萬機不可勝數朝野化焉號曰杜武庫言其無所不有王隱晉書

叱梁冀帶劍

後漢張陵字處仲為尚書省歲朝梁冀帶劍入省陵叱冀令出敕虎賁奪其劍百僚肅然冀弟不疑曾舉陵孝廉謂曰昔之舉君所以自罰也

陵曰今申公憲以報私恩本傳

呵虎賁置弓

朱穆拜尚書正月百官朝賀畢虎賁當陛下置弓於地曰此天子弓誰敢干越穆乃呵之曰天子弓當載之盾首之上乃敢置地大不敬即收虎賁付詔獄治罪莫不肅然張璠漢記

古今文集

雜著

上李實尚書

韓愈

愈來京師於今十五年所見公卿大臣不可勝

數皆能守官奉職無過失而已未見有赤心事
上憂國如家如閭下者今年已來不雨者百有
餘日種不入土野無青草而盜賊不敢起穀價
不敢貴百坊百二十司六軍二十四縣之人皆
若閭下親臨其家老姦宿賊銷縮推沮冤亡鬼
喪影滅踪絕非閭下條理鎮服布宣天子威德
其何能及此

謝襄陽李夷簡尚書撫問啓

柳宗元

某啓當州員外司馬李幼清傳示尚書委曲特
賜記憶過蒙存問捧讀喜懼浪然流涕慶幸之
深出自望外伏惟尚書鶚立朝端風行天下入
統邦憲出司主憂控此上游式是南服凡海內
奔走之士思欲修容於轅門之外躡履於油幢
之前譬之涉蓬瀛登崑閬不可得而進也某負
罪淪伏聲銷跡滅固世俗之所棄親友之所遺
敢希大賢曲見存念是以展轉歔歔晝詠宵興
願爲厮役以報恩遇瞻仰霄漢邈焉無由網羅
未解縱羽翼而何施囊檻方堅雖虎豹其焉往
不任踊踴懇戀之至謹奉啓起居輕黷威嚴倍

增戰越

上河陽烏尚書欲獻文啓

柳宗元

伏以尚書以碩德偉才代著勲烈兩河定亂三
城建功鼎彝竹帛未足云紀進臨汝上控制東
方隱然長城朝野倚賴宗元雖屏棄遐壤而飽
聞德聲所恨不獲親執鞭弭以備戎伍夙夜踴
躍不先寧居伏以威稜所加狂狡已震莫大之
績重復增崇小子久以文字進身嘗好古人事
業專當具筆札拂縑緗贊揚大功垂之不朽瞻

望霄漢戀慕交深冒黷威嚴伏增戰越

律詩

多病執熱奉懷李尚書 杜甫

衰年正苦病侵凌
首夏何須氣鬱蒸
大水淼茫炎海接
竒峯磳兀火雲昇
恩霑道暍黃梅雨
敢望宮恩玉井冰
不是尚書期不顧
山陰野雪興難乘

暮春陪李尚書過鄭監湖亭汎舟得

過字

杜甫

海內文章伯湖邊意緒多
玉樽移晚興桂楫帶

酣歌春日繁魚鳥江天足
芰荷鄭莊賓客地衰
白遠來過

送李遜尚書赴襄陽八韻 韓退之

帝憂南國切改命付忠良
壤畫星搖動旗分獸
鞞揚五營兵轉肅千里地
還方控帶荆門遠飄
浮漢水長賜書寬屬郡戰
馬隔鄰疆縱獵雷霆
迅觀綦玉石忙風流峴首
客花艷大堤倡富貴
由身致誰教不自強

總侍郎

歷代沿革

初秦置侍郎無員分隸三署主執
戟侍宮殿出則充車騎**漢**因之侍

郎秩四百石以其為郎內侍故曰侍郎侍郎
六卿之副凡諸郎掌更直執戟宿衛諸殿門
以侍衛之故通謂之侍郎**武帝**時東方朔為
郎後楊雄為侍郎當時謂之官不過侍郎位
不過執戟是也尚書亦有侍郎初入臺稱郎
中滿歲稱侍郎**梁**尚書郎入臺功高者轉為
侍郎**隋**煬帝二年尚書六曹各置侍郎一人
以貳尚書之職並正第四品今之侍郎其置

自此始又改諸司侍郎但曰郎吏部爲選部
郎禮部爲儀曹郎兵部爲兵曹郎刑部爲憲
曹郎工部爲起曹郎以異六侍郎之名唐武
德六年廢六司侍郎貞觀二年復又降爲正
四品下惟吏部侍郎爲正四品上咸亨元年
復爲侍郎總章元年吏部兵部各增侍郎一
員宋以爲階官至元豐官制行始有職掌元
祐二年初置權侍郎從四品如未歷給事中
中書舍人及待制以上者並帶權字祿賜比
諫議大夫崇寧罷權侍郎建炎四年復置大

元仍之置六部侍郎

羣書要語

位不過侍郎擢纔給事黃門楊雄
解朝周歷五曹之副建明萬事之

本中臺政本思舉舊章六卿貳職今之盛選冊

府元龜序文昌貳卿位次八座東坡除陸佃制

六卿之副百工牧唐制侍郎掌貳令之職朝廷

大政參議焉臨軒冊命爲使則持冊書授之四

夷來朝則授其表疏而奏之獻贄幣則受以付

有司唐百官志侍郎自皇朝以來爲衣冠之華

選自非履歷清要望實具美者無以居之類要

侍郎三十六人四百石一曹有六人主作文書

起草後百官志

詩句客曾與天通出入清禁中李白召登金華

省我入銀臺門同上登臨憶侍郎杜三賢惟侍

從卓犖傾鄒枚韓侍從近臣有虛位公今此去

何時歸 幸得履中氣忝從拂天棖 紅旗照

海壓南荒微入臺中作侍郎並同上響切晨趨

佩煙濃近侍香 柳優游侍從臣左右天子顧六

一集 玉殿清霜綴曉班 晚登玉墀侍珠旒並

同上與君持橐侍帷幄同到溫室觀堯奠東坡

紫府侍臣鳴玉佩山谷大似不蒙稽古力至今

猶著侍臣冠見山谷

古今事實

閑達故事

後漢陽球字方正為尚書侍郎閑達故事章奏

處議為臺閣所崇信本傳

彌綸舊章

謝承父嬰為尚書侍郎伏事丹墀彌綸舊章謝

承後漢書

尚德之舉

侍郎官重尚德之舉顛宜當之

韓愈舉韋顛自代狀

古今文集

雜著

薛左丞謝除門下侍郎表 汪藻

久參帷幄方俟黜幽進貳機衡遽叨圖舊莫寢
已成之命唯深非據之憂席寵過隆撫躬何幸
中謝伏念臣粵從孤遠遭值聖明少誦師言每
信書而違俗晚陪國論更充位以妨賢蒙淵鑒
之誤知保孤衷而平進肆竭股肱之力何施毫
髮之功豈伊白首之衰蹤堪此黃扉之重任雖
緣人乏實玷詔除茲蓋伏遇

皇帝陛下剛健粹精聰明齊聖疏通萬物之理
灼見群臣之心猥憐樸學之無他擢處周行之
至要第崇資顯秩當收有用之材方治世昌辰
尤急可觀之效誓勤鞭策力振綱維與多士以
同寅上承休德殞百身而圖報敢愛餘生
律詩

寄鄭侍郎

王介甫

兩朝人物嘆賢豪凜凜清風晚見褒江漢但歸
滄海閩丘陵難學泰山高放懷詩酒機先息回

首功名世自勞久願作公樽俎客恨無三畝斷蓬蒿

送張侍郎

韓愈

司徒東鎮馳書謁丞相西來走馬迎兩府元臣今轉密一方逋寇不難平

寄王侍郎

杜甫

何限倚山木吟詩秋葉黃蟬聲集古寺鳥影度寒塘風物悲遊子登臨憶侍郎老夫貪佛日隨意宿僧房

總郎中

歷代沿革

初秦置郎中令其屬官有三署五官中郎將左中郎右中郎將凡三

署署中有郎中每員多至十人分隸三署主

執戟侍宮殿出則充車騎**漢**因之郎中之名

猶因三署本號置尚書郎四人分掌尚書事

時馮唐為郎中署長**光武**分尚書為六曹每

一人尚書則領六郎凡三十六郎自漢以來

尚書諸曹郎中侍郎或不兩置**魏**自黃初改

祕書為中書置通事郎掌詔草而尚書郎有

二十三人非復漢時職任**晉宋齊**唯置郎中

梁陳兩置後魏北齊唯置郎中隋以諱忠不
置郎中煬帝改曰郎唐改郎為郎中龍朔二
年改為大夫咸亨光宅神龍並隨曹改復宋
元豐官制行郎官理郡守以上資任者為郎
中郎中員外郎亦自為兩等頗自履歷而授
之後來相承必欲以關升知州資序為郎中
於是拜員外者具改官實歷歲月申吏部不
以若干任但通理細滿八考則陞知州乃作
正郎別命詞給告常有旨初除郎官雖資歷
已高且為員外郎候吏部再申然後陞作郎

中大元六部各置郎中

羣書要語

舊選尚書郎極清望也山濤啓事

鄧遐有才義論者以為宰士之俊

宜用為郎同上臺郎皆朝之俊選當足處事宜

辨正凝滯也裴度奏今以劣弱之質任督責之

官以無用之才管繁劇之任且臺郎清顯論望

宜充者郭璞表草奏郎吏之選必資時秀元和

制誥宜序天臺之屬同上濫跡星署職類發揮

草臺又參奏議頗練朝章宜從滿歲之遷俾

轉分曹之次處以彌綸之職當茲俊茂之選

宜正列星之次俾承賜筆之寵省理辨疑時稱

簡達 高選髦士以分劇曹並同上優遊省闈

珥筆華軒潘岳贈陸機握蘭建禮總郎官劉孝

儀為江僕射薦士表翔于郎署韓文叨陪錦帳

坐漢百官志往自星郎爰秉天憲楊國忠制嘉

乃令子為吾望郎元徽之行韋審規父漸制郎

官古之元士天下之務多所關決其於損益大

矣常衮制虞詡曰臺郎顯職乃筮仕之通階職

類臺郎御史邦之俊茂若出宰牧守頌聲興矣

晉起居注晉尚書郎選極清美號為大臣之副

通典

詩句郎官清要為世稱韓愈永真行馨香粉署

妍杜為是先帝白髮郎東坡雞舌還應共賜香

君為尚書郎坐擁百吏繁東川得望郎坐

與西爭重並同上喜得廊廟舉嗟為臺閣分遠

從南斗外遙仰列星文蘇味道郎官有錦帳杜

古今事實

含香握蘭

尚書郎伏奏事黃門郎對揖跪受故稱尚書郎

懷香握蘭趨走丹墀應邵漢官儀又尚書郎口

含雞舌香以其奏事答對欲使氣息芬芳也 宋百官志

作文起草

尚書郎主作文書起草晝夜更直五日於建禮門外 漢官儀

粉署丹墀

粉署郎署也以諸郎官握蘭含香故云馨香又謂之畫省以粉畫之故言粉署又省中皆以胡粉塗壁畫古賢烈士以丹朱漆地故謂之丹墀 通典

青纁白被

尚書郎入直官給青纁白綾被或以錦被給帷帳茵褥通中枕太官供食物湯官供餅餌及五熟果實之屬五日一美食下天子一等 漢官儀

夕對青瑣

黃門郎日夕入對青瑣門拜 同上

月賜筆墨

漢尚書郎月賜赤管大筆一雙隃麋墨一丸 通典

獨宿臺上

黃香為尚書郎常獨止宿臺上晝夜不離省闈

帝聞而善之類要

常伏省下

馮豹為尚書郎每奏事未報常伏省下或自昏至明天子默使人持被覆之摯虞三輔史錄

太微積星

後漢楊秉疏太微積星名為郎位入奉宿衛出宰百里

太微後星

太微後二十五星郎位也史記
一曰依烏

郎位十五星在帝位東北一曰依烏郎府也三省郎中是其職也晉天文志

號三列宿

韋湊祖叔諧正觀中為康部郎中與弟吏部郎中叔謙兄主爵郎中季武同省時號三列宿

拜舉孝廉

胡廣舉孝廉為天下第一旬月拜尚書郎恪勤職事所掌兼治兩曹續漢書
梁魏武集選舉令云國家舊法選尚書郎以取孝廉也

詔選清白

安帝元初六年詔中郎將選孝廉郎寬博有謀
清白行高者出補令丞尉後漢記

容儀端正

田鳳字季宗為尚書郎容儀端正入奏事靈帝
目送之因題柱曰堂堂乎張京兆田郎三輔決錄

威容可視

杜軫為尚書郎威容可視華陽國志

皆須稱職

永昌五年勅六官分事四方取則尚書郎皆是
妙選須稱職司馬馬唐會要

不可賞能

開成四年鹽鐵推官姚勗鞫問河陰黠吏得實
除職方員外郎右丞韋溫上疏以郎官朝廷之
清選不可以賞能吏續通典

豈郎才邪

李林甫源乾曜執政乾曜子潔為林甫求司門
郎中乾曜素薄之曰郎官應得才望哥奴豈郎
中才邪哥奴林甫小字也同上

至郎足矣

孔若思勵學擢明經歷庫部郎中嘗曰仕宦至

郎中足矣座右置水一石明自足意同上

自起撞郎

明帝性徧察常以事怒郎樂崧以杖撞之崧走入床下帝甚怒疾言曰郎出郎出崧曰天子穆穆諸侯皇皇未聞人君自起撞郎帝赦之鍾離意傳

皆主更直

五官中郎將一人主五官郎五官郎中無員凡郎官皆王更直執戟衛諸殿門後百官志

襜被逕出

魏舒為尚書郎時郎選或有非其人者論者欲

沙汰之舒曰吾即其人也襜被逕出同僚素無

清論咸有愧色談者莫不詠其高晉本傳

給帳入直

尚書郎入直官給帷帳氈褥侍史二人選端正

妖麗執香爐護衣服奏事明光殿宋百官志

職典樞機

徐防補尚書郎職典樞機周密畏謹奏事三世未嘗有過云類要

才堪廊廟

索靖子綝字巨秀少有逸羣之量靖每日廊廟

之才非簡札之用州郡吏不足汙吾兒也舉秀才除郎中晉書

白首郎署

馮唐以孝廉著為郎中署長白首屈於郎荀悅漢紀

一家郎官

韋虛心父子兄弟更踐郎署時稱郎官家舊唐書

披靚青天

樂廣為尚書郎與何晏鄧颺等談講衛瓘見而竒之曰常恐微言將絕今復聞之命諸子造焉謂曰人之冰鑑也每見此人瑩然如披雲霧而

靚青天也王隱晉書

上應列宿

後漢館陶公主為子求郎不許明帝謂羣臣曰郎官上應列宿出宰百里本紀

馮勤佳吏

馮勤除為郎中每引進帝顧左右曰佳乎吏也移本傳

趙華高名

趙華早擅高名在官途五十年累經貶謫蹇躓備至入仕三十年方霑省官

古詩

天星送楊凝郎中賀正韓昌黎

天星半落雞喔咿僕夫起餐車載脂正當窮冬
寒未已借問君子行安之會朝元正無不至受
命上宰須及期待從近臣有虛位公今此去歸
何時
律詩

和趙郎中捕蝗韻 蘇子瞻

麥穗人許長穀苗牛可沒天公獨何意忍使蝗
虫發驅攘著令典農事安可忽我僕既胼胝我
馬亦欵矻飛騰漸云少筋力亦已竭苟無百篇
詩何以醒睡兀初如䟽畎澮漸若決澥渤往來
供十吏平生輕妄庸熟視笑魏勃愛君有逸氣
詩壇專斬伐民病何時休吏職不可越慎無及
世事向空書咄咄

送陸郎中 錢起

事邊仍戀主舉酒復悲歌粉署含香別轅門載
筆過鶯聲出漢苑柳色過漳河相憶情難盡離
居春草多

送致政朱郎中東歸 王介甫

平生不省問田園白首忘懷道更尊已上印書
辭北闕稍留冠蓋餞東門馮唐老有為郎戀踈
廣終無任子恩今日榮歸人所羨兩兒腰綬擁
高軒

喜李侍御拜郎官入省 錢起

粉署花驄入丹霄紫誥垂直廬驚漏近賜被覺
霜移漢主前瑤席穰侯許鳳池應憐後行鴈空
羨上林枝

聞崔馬並拜臺郎 蘇味道

振鷺齊飛日遷鶯遠聽聞明光共待漏清覽各
披雲喜得廊廟舉嗟為臺閣分遠從南斗外遙
仰列星文

南省伴直 韋莊

文昌二十四仙曹盡倚紅簷種露桃一洞煙霞
人迹少六行槐柳馬聲高星分夜彩寒侵帳蘭
惹春香綠映袍何事愛留詩客宿滿庭風雨竹
蕭騷

賀楊十二新拜省郎 白樂天

文昌新入有光輝紫界宮墻白粉闈曉日雞人

傳漏箭春風侍女護朝衣

省中即事

岑參

華省謬為郎蹉跎鬢已蒼到來還襆被隨例且
含香

嘲趙郎中

賀遂涉

員外由來美郎中望不優寧知粉署裏翻作土山頭

總員外郎

歷代沿革

晉宋尚書省置員外郎分判曹事
隋開皇三年尚書二十四司各置

員外郎一人謂本員之外復置郎也掌其曹

之版籍侍郎缺則釐其曹事此今員外郎所

由始也通典注歷代尚書郎各以曹名為稱

首或謂之侍郎皆無員外之號前代史傳及

職官要錄或有言員外郎者蓋謂員外郎散

騎侍郎耳非尚書之職也煬帝三年每司減

一郎置承務郎一人同開皇員外之職**唐**尚

書諸曹各置員外吏部置二人龍朔咸亨光

宅並隨改復**宋**元豐官制六曹郎官理郡守

以上資任者郎中通判以下資序者為員外

郎雖理知州資序未曾實歷知州及監司開
封府推判官者止除員外郎 **大元** 六部各置
員外郎

羣書要語

任外郎之員丞諸曹之務胡文恭
行王稹制陟中臺之局寘副郎之

王鼎制

俾升文昌用副郎選公是行雍明遠

古今事實

散郎

外郎散郎也 漢惠帝純注

副郎

韋侯以考功副郎守盛山 韓文盛山十二詩序

彌重其選

員外郎唐朝彌重其選 通典

司皆其選

職員令二十四司皆其選也

古今文集

律詩

和王員外晴雪早朝 鄭谷

紫微晴雪帶恩光
繞仗偏隨鴛鷺行
長信月留寧避曉
宜春花滿不飛香
獨看積素凝清禁
已

覺輕寒讓太陽題柱盛名兼絕唱風流誰繼漢
田郎

送鄭員外

韓翃

風流不減杜陵時五十爲郎未是遲孺子亦知
名下士樂人爭唱卷中詩身齊吏部還多醉心
顧尚書自有期要路眼看知已在不應窮巷久
低眉

同錢員外禁中夜直 白居易

宮漏三聲知夜半好風涼月滿松筠此時閑坐
寂無語藥樹影中唯兩人

聽水部吳員外新詩 白居易

朱紱仙郎白雪歌和人雖少愛人多明朝與向
詩家道水部如今不姓何

新編古今事文類聚卷之十

新集

新編古今事文類聚卷之十一

新集

南江富大用時可編

六曹部

吏部尚書

歷代沿革

吏部尚書周之天官卿也漢成帝

置列曹尚書四人其一曰常侍曹

光武改常侍曹為吏部曹主選舉靈帝改吏

部為選部魏改選部為吏部主選部事右於

諸曹尚書晉吏部尚書一人宋世祖大明二

年置二吏部尚書後還置一人齊梁陳皆曰
吏部尚書自漢及魏授此職者並云吏部尚
書若授諸曹尚書直云尚書然此官歷代班
序常尊不與諸曹同也自魏至梁並第三等
梁定十八班班多為貴吏部尚書班十四諸
曹尚書班十三後齊尚書分統列曹隋吏部
尚書統吏部侍郎二人主爵侍郎一人司勳
侍郎二人考功侍郎一人唐因隋制吏部尚
書一員正三品龍翔二年改為司列太常伯
光宅元年改為天官尚書神龍元年復舊天
寶十一載改為文部至德初復舊總判吏部
司封司勳考功四曹事宋張昭為尚書獨掌
京官七品元豐官制行以審官東院歸吏部
尚書左選審官西院歸吏部尚書右選大
元因唐宋舊置吏部掌天下文武官吏選授
勳封考察廉能出給制誥等事吏部令史分
掌名頭以尚書為之長

羣書要語

冢宰掌邦治統百官均四海書周
官乃立天官冢宰使帥其屬而掌

邦治以佐王均邦國禮太宰之職掌建邦之六

典以佐王治邦國同上尚書萬事之本選部五

曹之右常集吏部尚書制輟乃鈞衡專茲銓鏡

唐大詔令辨論官材澄汰流品比諸內史選妙

秩清舊制銓管九流品藻清濁李重集選曹歲

冠六卿統百職白集天官太宰秩序常尊自昔

迄今冠諸卿首同上藻鑒流品是資清識唐臨

冊爾其懸衡處物虚心待士同上文昌六卿楊

億代表中臺職司願講求於故實未央朝會時

瞻近於清光同上合左右之聯歸簿領者凡六

十案奏文武之士在考覈者逾二萬員李清臣

表天官冢宰之崇文昌選部之重錢表類尚書

總統百度是為古官吏部表率六曹茲為重任

天官之任人物所宗以撥煩治劇之才行激濁

揚清之政並同上漢革民曹魏仍東掾毛孝先

以清公見美盧子巖以貞固任職張纘表樂彥

輔雍容自守當時恨其寡譽山巨源意存賞拔

不免與世沉浮同上東西兩漢左雄孤絕於前

南北二晉山濤莫嗣於後沈約代表自非伯豪

之天下稱能仲子之時人歸德孝先之拔奇抑

偽巨源之黜惡舉善然後可以銓鏡流品平均

衡石

梁王筠為第六叔讓吏尚書表

去歲冬初

國學之老博士爾今茲首夏將亞冢司雖千秋

之一日九遷荀爽之十旬遠至方之微臣未為

速達

任昉為范雲讓吏部尚書表

况今日之選

專歸尚書以一人之鑒照察天下劉毅所云一

吏部兩郎中而欲究鏡人物何異以管闕天求

其博哉

崔亮答劉景安書

假勢風雲非由羽翮

徒得推遷就列僂俛當時曾無辟雍議禮之名

詎有銅雀獻賦之敏而政本寔繁司會攸切温

子升廣陽王讓吏部尚書表

詩句

曾中無冰鑑敢當吏部銓

山谷

丘山岌岌

連天峻沔水澄澄澈底清

王丘崔沔掌吏部時

人為之語云分紀

符彩照千里銓衡總九流

劉斌和許給事傷牛尚書持衡留藻鑑聽履上星

辰杜

古今事實

周之天官

吏部尚書周之天官卿也六典又掌文官選舉

判天官司勳司封考功等四司職員令

漢之選部

吏曹尚書典選舉齊祀屬三公曹靈帝末梁鵠
為選部後百官志注

士願居選

梁王泰山仲通能接人士人士願居其選官項
之為吏書衣冠傾屬梁書

時皆推美

李尚書又王尚書丘崔賓客沔掌吏部皆獲當
時之美

三世吏部

謝舉字言揚掌吏部舉祖莊於宋代再典選至
舉又三為此職前代未有梁書

五人尚書

謝莊子肫肫子淪淪子覽覽孫温六代五人皆
為吏部尚書同上

先選德行

隋牛弘為吏部尚書其選舉先德行而後文才
進用多稱職吏見隋書

好抑文雅

唐戴胄檢校吏部尚書然好抑文雅獎法吏時
以寡學為訾本傳

一時精選

唐九齡入相用嚴挺之為尚書左丞知吏部選
陸景融知兵部選皆為一時精選分紀

十年進拔

韋世康拜吏部尚書前後十餘年多所進拔朝
廷稱為廉平嘗因休暇謂子弟曰吾聞功成身
退古人常道今年將耳順志在懸車汝輩云何
子初嗣荅曰大人澡身浴德名遂官成盈滿之
誠先哲所重欲追蹤二疎伏奉尊命

當舉此人

吳隱之字處默有孝行母亡每哭韓康伯母輒
泣涕語康伯曰汝後若居銓衡之職當舉此輩
人及康伯為吏部尚書因進用之遂歷清要

中興書

始得此人

韋思謙舉進士累補應城令歲餘調選思謙在
官坐公事微殿舊制多未叙進吏部尚書高季
輔曰自居選部今始得此一人豈以小疵而棄
大德遂擢授監察御史由是知名

法不如毛

毛玠為吏部尚書無敢好衣美食者魏武歎曰
孤之法不如毛尚書令使吏部用心如玠風俗
之易不難

代更舉阮

魏盧毓字子家為吏部尚書魏文帝使毓自選
代曰得如卿者乃可毓舉鄭冲帝曰文和吾自
知之更舉吾所未聞乃舉阮武孫邕帝於是用
邕並魏志

率人以儉

魏毛玠為東曹掾與崔琰並典選舉用皆清正

之士雖於時有盛名而行不由本者終莫得進
務以儉率人由是天下之士莫不以廉節自勵
執心平當

晉劉雄字公平遷吏部尚書執心平當本傳

稱若神明

梁范雲性機警且善屬文為吏部尚書居選部
寄任隆重書牘盈案賓客滿門應答如流無所
壅滯官曹文墨發摘若神明時人莫不服其明
瞻職官分紀

止談風月

梁徐勉為吏部尚書居選官彝倫有叙嘗與門人夜集客有虞曇求詹事官勉正色荅曰今夕止可談風月不宜及公事時人服其無私本傳

清通簡要

鍾會見王戎裴楷總角曰裴楷清通王戎簡要後二十年此二賢當為吏部尚書冀是時天下無復滯才劉義慶世說

周謹廉素

太康四年治選曹銓管人才宜得忠恪寡欲抑華崇本者尚書朱整周謹廉素以道自居是其

人也其以整為吏部尚書

晉起居注

不受一錢

晉鄧攸遷吏部尚書牧馬於家庭妻息食素不受一錢於人本傳

不受餅金

褚彥回為吏部尚書有一人求官袖中將一餅金因求請問出金示之曰人無知者彥回曰自應得官無假此物若必見與不得不相啓此人

大懼收金而去本傳

饋餉不受

江湛爲吏部尚書家甚貧不營私財饋餉盈門
一無所受南史

遊處不雜

袁昂雅有人鑒遊處不雜爲吏部尚書梁帝謂
曰齊明帝用卿爲黑頭尚書我用卿爲白頭尚
書本傳

一字拔人

蔡克居選官苟進之徒望風畏憚初克未仕時
山簡常與王衍書曰蔡子尼今之正人行以書
示衆曰山子以一字拔人然未易可稱後衍聞

克正選官曰山子之言驗於今矣晉書

三爲此職

謝舉遷吏部舉祖莊於宋代再典選至舉又三
爲此職前代未有本傳又唐韋慶凡三掌選銓
授平允議者與之

佩玉乘輅

晉令吏部尚書五時朝服納言幘進賢兩梁冠
佩水蒼玉

佩囊簪筆

尚書佩契刀囊執板笏簪筆袁子正書

毛玠柴車

毛玠雅亮公正在官清恪其典選舉拔貞實斥
華偽于時四海翕然莫不勵行至乃長吏還者
垢面羸衣常乘柴車軍吏入府朝服徒行吏絜
於上俗移於下民到于今稱之行狀

褚炫紙帽

南齊褚炫為吏部尚書炫居身清正在選部門
庭蕭索賓客罕至出入左右常捧一黃紙帽風
吹紙剝殆盡南史

李肅題目

李肅字偉恭善論臧否得中甄竒錄異薦述後
進題目品藻曲有條貫以此人服之擢為選部
尚書舉選號為得才同上

山公啓事

晉山濤為吏部尚書前後選舉周徧內外而並
得其才除尚書僕射領吏部濤再居選職十有
餘年每一官缺輒啓擬數人濤所奏甄拔人物
各為題目時稱山公啓事山濤傳

備儀注禮

牛弘拜吏部尚書時高祖召諸儒論新禮殺輕

重弘所立議衆推服之仁壽二年獻皇后崩王公已下不能定其儀注楊素謂弘曰公舊學時賢所仰今日之事決在於公弘乃不拜讓斯須之間儀注悉備素嘆曰衣冠禮樂盡在此矣非吾所及也

隋書

作考課法

盧毓爲吏部尚書文帝使毓自選代曰得如卿者乃可前此諸葛誕鄭颺等馳名譽有四窻八達之誚帝疾之詔選舉莫取有名者如畫地作餅不可啖也盧毓曰名不可以得異人而可以得常士王者正以循名按常爲職但當有以驗其後今考績之法廢而以毀譽相進退故真僞混淆虛實相蒙帝納其言詔作考課法

被召即拜

晉少帝即位以蔡廓爲吏部尚書不拜乃以王德惠代之惠被召即拜未嘗接見客有與書求官輒置書閣上及去職其封如初時談者以廓之不拜惠之即拜事雖異而意同南史

加祿先呵

王弘自領選將加榮祿於人者每先呵責然後

施行若美相晤接者必無所詣人問其故荅曰
王爵既加於人又相撫勞便成與主分功若求
者絕官叙之分既無以為惠又不微借顏色即
大成怨府問者悅伏

與官嗔笑

謝莊代顏竣為吏書竣容貌嚴毅常有不可犯
之色莊風姿溫美有喧訴常歡笑荅之時人語
曰顏吏部嗔而與人官謝吏部笑而不與人官
談藪

隨時浮沉

王戎領吏部尚書自戎居選未嘗進一寒素退
一虛名理一冤枉殺一疽嫉隨時浮沉門調戶
選

不許江總

陳孔煥為吏部尚書太子叔寶欲以江總為太
子詹事煥曰江總有陳陸之才而無園綺之實
太子深以為恨自乃言於陳主將許之煥乃啓
願選敦重之才以居輔導

陳紀

獨識漫漢

東魏以楊愔典選嘗六十人為一甲愔令其自

叙訖不省文簿便次第呼之無有悞者後有選人魯漫漢自言猥賤獨不見識惜曰卿前在元子思坊騎秃尾草驢經見我不下以方麴障面我何以不識卿漫漢驚服

三國典畧

下筆招怨

郭祚為吏部揚身潔清重惜官位至於銓授假令得人必徘徊久之然後下筆即云此人便已貴矣當時每招怨言

搖扇厲聲

元順為吏部尚書時朱暉素事高陽王雍欲以為廷尉評頻煩託順順不為用雍撫几曰身天子之子天子之弟天子之叔天子之相元順何人以身成命順搖白羽扇徐謂雍曰高祖遷宅中土初定九流官方清濁執儀萬古而朱暉小人身為省吏何合為廷尉清官雍曰身為丞相錄尚書如何不得用一人為官順厲聲曰殿下必如是順當依事奏聞

不署紙尾

宋廢帝時蔡廓為吏書徐羨之謂傅亮曰黃門已下悉委蔡自此已上固宜共參同異廓聞之

日我不能為徐羨之署紙尾也遂辭不拜建康錄
隨而下筆

唐裴光庭為相兼吏部尚書與中書令蕭嵩爭
權不協及為吏部奏用循資格并促選限光庭
卒嵩又奏請一切罷之光庭所引進者出為外
職時有門下主事閻麟之為光庭腹心專知吏
部過官每麟之裁定光庭隨而下筆時人語曰
麟之口光庭手

秉筆當除

韋巨源以吏書同中書門下三品時要官缺執
政以次用其親巨源秉筆當除十人皆諸宰相
近屬楊再思曰吾等誠負天下巨源曰時當爾
耳唐書

舉扇一揮

蕭子顯為吏書負才氣見凡流賓客不與交言
但舉扇一揮而衣冠切恨之齊書

謝眺慙色

初謝眺告王敬則敬則女為眺妻常懷刀以投
眺眺不敢相見及當拜吏部謙挹尤甚尚書郎
范績嘲之曰卿才人無慙小選但恨不能刑于

寡妻眺遂有慙色 梁書

修義失色

元修義遷吏部尚書在銓衡唯事貨賄授官小
大皆有定價時高居者先叙上黨郡闕遂求之
修義私已許人抑居不與居大言不遜對衆呼
天唱賊人問居曰白日公庭安得有賊居指修
義曰此坐上者違天子明詔物多者得官京師
白刼此非大賊乎修義失色

官有定價

元暉遷尚書納貨官皆有定價大郡二千疋中

郡一千小郡五百 北史

士不問賢

崔亮後魏時為吏部尚書為停年格不問士之
賢愚專以停解日月為斷 同前

人中作市井

袁真為監軍范立平為吏部尚書坐語袁曰卿
此選還不失護軍袁曰立平卿何事人中作市
井 語林

後主借鼓吹

梁蔡徵拜吏部尚書啓後主借鼓吹荅曰軍樂

有功乃授蔡徵不自量揆紊我朝章然其父景
歷既有締構之功宜且如啓

帝問何先

宋葉顥權吏部尚書乾道九年召對便殿賜坐
賜茶禮異他日帝曰吏部條例朕亦置一通在
禁中又問卿當官以何為先對曰以公忠為先
帝曰卿宜無忘此二字後五日除簽書越二日
兼參政

楊誠齋集

上漢有序

宋晏敦復為吏部尚書上嘗嘆曰敦復疑重剛

方當公介然衡總有序擿發清明事無奸滯山

濤毛玠無以過之

周平園集

諫屏鞠戲

陳俊卿謚正獻召為吏書時上未能屏鞠戲公
上疏力諫入對上迎謂曰前日之奏備見忠讜
朕決意用卿矣十二月拜同知兼參政

因論耗費

吏部尚書張燾因對論甲庫萃工巧以蕩上心
酤良醢以奪官課教坊樂工員數日增俸給賜
賚耗費不貲皆可罷上曰卿可謂責難于君明

日罷甲庫諸局以酒庫歸有司減樂工數百人
中興系年錄

古今文集

雜著

吏部尚書廳壁記 孫逖

吏部尚書在周爲太宰之職其建設徒屬敷陳
事典則周官備之矣秦滅古法始置尚書漢增
其制創立選部故靈帝以梁鵠爲選部尚書是
以魏改選部尚書爲吏部尚書自晉宋至于北
齊皆因之宇文朝依周官置太冢宰卿一人蓋

其任也隋革周制復曰吏部尚書皇朝龍朔二
年改爲司列太常伯咸亨元年復爲吏部光宅
元年改爲天官尚書神龍元年又爲吏部尚書
綜九流之要爲六官之長位尊任重實在于茲
自武德以來多以宰相兼領一彼一此更爲出
入才難不其然乎皇帝在位之二十二年缺其
官選于衆乃命武都公自兵部尚書拜焉公地
惟宗英才則人傑忠孝自律矜嚴成憲式是軌
度諒于衡石國之利也所及遠哉天鑒有唐俾
多吉士踐此位者四十八人嘉名已著於國史

故事宜存於臺閣繫以日月自得春秋之義記
其代遷更是公卿之表以備官學列爲壁記焉
爲李景謨讓天官尚書表

李嶠

寵命載臨震悸交集鞠躬自覲屏營無措中謝
臣聞俊又在官百揆所以時叙名器妄假九流
於是咸曠事關隆替義難忝越臣才踈行缺學
淺智空十舍無千里之資一經乏三冬之教徒
以遭逢昌運玷膺籍符幸雨露之曲成遇山川
之廣納遂得差肩冕笏比踪流品出入臺省周
旋階闈鏘金鳴玉坐榮枯朽擊水搏風顧慙腹
背自忝司衡鏡亟易星灰雖智力已窮而清通
未效朱紫多紊涇渭莫辨宜其抵罪觸網稍清
官謗翻乃假寵增服更垂天獎是用荷恩內訟
以榮爲憂且夫八座位隆五曹望重典南宮之
喉舌象北斗之樞機式資藻鑒奚綜賓實自非
孝先亮直彥輔公忠山濤之簡靜篤素顧譚之
心精體密何以對揚天哲厭塞人望顧斯政本
實總國彛豈臣庸愚所堪尸忝伏願迴光寢照
返汗收恩察臣由衷之請矜臣陳力之議則朝

端允穆天下至公四始輟在梁之譏六爻無負
乘之累矣無任慙懼之至

辭免除權吏部尚書狀 樓鑰

寵光下逮惕懼靡遑竊以選部攸司是曰六官
之長文昌攝事亦叨八座之稱縱難求傑異之
才猶當取踐剔之舊臣一登仕路三入修門年
除歲遷寢踰於始望寢驚夢愕屢蹈於危機惟
茲瑣闥幾更月琯遇事輒發徒自積於怨仇忤
旨爲多方日虞於呵譴敢期睿獎亟賜褒遷徑
由夕拜之聯擢試天官之職兼汗青於東觀乃
視草於此門揣愚分以何堪恐公言之不貸伏
望 皇帝陛下收還成渙改畀真賢俾退服於
舊班庶漸伸於歸望

謝除權吏部尚書表 樓鑰

充員瑣闥自顧罔功撮長銓曹忽蒙誤寵仰皇
慈之至渥揣微分以何堪中謝竊以選部持衡
夙號六卿之長文昌聽履實爲八座之聯非素
推公方不足以杞吏奸非妙有德望不足以厭
輿論雖黃繖之下無參異同而縉紳之流鮮不
關係宜求精敏之彥以當要劇之司伏念臣才

不逮人學徒泥古一爲支郡三入脩門久侍上
皇愧愚衷之無補親逢嗣聖荷褒擢之有加代
言非陸贄之工批敕謝李藩之器俯徇芻蕘之
論屢寬斧鉞之誅去省眼者五年遂躡登於冢
宰離班心者一載遽首列於從臣禁林兼內制
之文史館涉信書之筆滿盈已甚控避莫回頌
御府之襲衣益之鞶帶駕天閑之良馬覆以雕
鞍但喜悅親之私敢云稽古之效茲蓋伏遇
皇帝陛下多能天縱盛德日新蒐舉異才踵登
持橐之選優容棄物獨負吹竽之慙宜黜而遷
以榮爲懼臣敢不深思僥冒勉竭疲庸爲山公
啓事之書知非所及守崔亮停年之格何足言
勞尚幾典選之平少助官人之道

與趙尚書書

朱元晦

茲者竊聞祭被追詔入長天官夫以尚書望實
之隆宜在廟堂參斷國論之日久矣去歲入朝
登用在即而抗論極言不以利害之私少有回
屈士論益以歸重而深恨其不少留也乃今幸
甚天啓聖心召還故官是蓋將授以政無可疑
者有識傳聞交相慶賀蓋不獨爲門下之私喜

也然今日之事蓋有甚難於爲力者不審明公
何以處之竊計雅懷於其大者素有定論不待
愚者之言矣惟其小者之一二區區鄙懷竊有
所疑於平日輒忘僭易而一言之惟高明之垂
聽焉蓋天下之事決非一人之聰明才力所能
獨運是以古之君子雖其德業智謀足以有爲
而未嘗不博求人才以自裨益方其未用而收
寘門墻勸獎成就已不勝其衆是以至於當用
之日推挽成就布之列位而無事之不成也今
日明公之立朝不爲不久而未聞天下有卓然
可用之才出於門墻之下自頃出臨藩服而熹
始得觀於進退官屬之際則見明公之所與者
率多碌碌凡庸睢盱偵伺以希寸進之流未有
以職修事舉衆所稱以爲當舉而得之者也而
况於其學行蘊畜真有大過於人者乎今者
進位於輔相之列則所資於天下之才者益衆
而所進退於天下之才者益重若但以前日進
退官屬之尺度取之則熹恐天下之士所以望
於明公者有未厭也時事如此之艱明公之任
如此之重而所以求助者如此之狹熹雖至愚

猶竊爲明公慮之而辱知有素不敢不及此而
一言也伏惟寬宏恕其狂易試加察焉蓋不惟
明公所自舉而凡所爲屬之同列以妨賢者之
路若宜皆在誣指之中則熹之虛實可覩矣來
使回自三山熹前此已屢拜啓薄冗姑此少申
賀禮而亦不敢爲無益之空言也未由趨拜履
舄伏乞以時爲國自重

吏部侍郎

歷代沿革
吏部侍郎周之小宰中大夫也漢
以來尚書侍郎今郎中之任北齊

陸邛兄弟爲相代兵吏部郎今侍郎也隋煬
帝三年尚書六曹各置侍郎一人以貳尚書
之職並正四品以下銓補多歸之唐武德初
因隋舊置吏部尚書掌六品七品選侍郎銓
掌八品九品選龍朔二年改爲司列少常伯
咸亨初改爲吏部侍郎光宅初改爲天官侍
郎神龍初復爲吏部侍郎天寶十一載改爲
文部侍郎至德二載復爲吏部侍郎本一員
總章二年加一員以裴行儉爲之本員爲中
銓新加員爲東銓通典云唐列三銓尚書掌

其一侍郎分其二尚書所掌謂之尚書銓侍郎所掌其一為中銓其一為東銓

制行以流內銓歸吏部侍郎左選

元豐初御

史書宣言天下選人名在吏部者且萬人索

其家牒以式注籍時將改官制先詔流內銓

稱尚書吏部官制行歸吏部侍郎左選以三

班院歸吏部侍郎右選

三班院舊例置局禁

中嘉祐間出之熙寧三年罷主簿元豐初又

詔與審官東院流內銓各省注簿一官制行

歸吏部侍郎右選侍郎從三品掌文臣未改

秩者凡始命或有殿負皆試而後選若應遷

格則團甲同郎官引見於便殿稟奏改官右

選掌武臣未陞朝者凡所任而試不中等及

已入官而未應選者皆勿注正闕若選路分

都監將官閣門祗候都總管司承受皆以名

上樞密院視朝入閣則執文武班簿對立官

制尚書侍郎通治曹事奏事則同班惟吏選

分領四選有所論奏則各以選事同所隸郎

官上殿續會要初置二員蘇頌左選李承之

右選大元仍唐宋制置吏部侍郎

君羊書要語

小宰之職掌邦之六典八法八則之貳周禮司小宰之職任佐平邦

典選重朝倫參我密啓屬於清鑒當勵濯纓之

操不遺刈楚之材晏公類要尚書六職天官首

之辨論官材澄汰流品比諸內史選妙秩清爾

其以裴王崔毛為心白集柳公綽制用解樞機

之務俾居衡鏡之職唐太詔令掌銓衡之品藻

宜叙九流楊億代表吏部典掌選舉至於所屬

之官有行封爵議勲庸稽功課之事咸以咨焉

侍郎實貳其長可不重哉南豐擬制夫以天官

之貳治夏卿之選簿書繁重條格紛委苟非其

人則士之失職而無告者多矣東坡集天官四

銓總覈人物澄清流品除孫覺制文昌貳卿位

次八座陸佃制吏部古之天官而侍郎小宰之

職曲阜傳堯俞制

詩句持衡留藻鑑聽履上星辰**注**見素為吏部

侍郎銓選平允上星辰以言其親帝之旁杜南

宮吾故人白馬金盤陀雄筆映千古見賢心靡

他舊注以南宮為禮部非也按天官書南宮朱

鳥權衡太微三公之庭將相執法郎位衆星

古今事實

銓衡之任

唐掌選部流內六品以下官是為銓衡之任凡初仕進者無不仰屬通典

銓綜之司

考功員外郎劉思立子憲為河內尉思立今日亡明日選人有索憲闕者時馬載為吏部侍郎書曰無乃注冬集朝廷咸曰真銓綜流品之司可謂振理風俗也

典選十載

楊纂長於吏道所在皆有聲績俄又除吏部侍郎前後典選十餘載人論稱為允當

典選六年

唐席豫為吏部侍郎玄宗謂之曰卿前為考功職事平允故有此授預典選六年有令譽又盧從愿精力于官偽牒詭功檢擿無所遺銓總六年以平允聞並唐書

四代居選

房穎叔拜天官侍郎自其高祖至穎叔四代咸居選部時論榮之分紀

旬月即拜

郎
何廣字伯始舉孝廉天下第一旬月拜吏部侍

賜鏡以表

高唐馮為吏侍凡所銓綜時稱平允太宗賜金背鏡一面以表其精鑒焉

改職又除

唐崔玄暉拜天官侍郎每介然自守卻絕請謁頗為執政所忌轉文昌左丞月餘則天謂曰自卿改職以來選司大有罪過或聞令史乃設齋

自慶此欲盛為貧惡尔今要卿復舊任又除天官侍郎

大革前弊

唐宋璟為吏書與侍郎李义盧從愿等大革前弊取捨平允銓綜有敘

不省私書

孔緯字化文權要有所私託書盈几不省並唐本傳

韋陟風采

韋陟遷吏侍選人多偽集與正調相冒陟有風采擿辨無不服者

裴楷風神

晉裴楷為吏部侍郎風神高邁容儀俊爽時謂之玉山照人本傳

孝基知人

隋吏部侍郎高孝基鑒賞機悟清謹絕倫房元齡杜如晦與選孝基特加賞異後以為知人隋書

行儉知人

裴行儉為吏部侍郎典選有知人之鑒見王劇與蘇味道謂人曰二子亦當掌銓衡之任後劇果為天官侍郎味道至相位

獎用孫張

王丘遷吏部侍郎典選復號平允其獎用如孫逖張鏡微皆一時茂秀本傳

掌選韓元

吏侍鄭杲注韓思復為太常博士元希聲為京兆士曹嘗謂人曰今年掌選韓元二子則吏部不負朝廷矣唐會要

前有裴馬

唐裴行儉馬載為吏部侍郎同時典選十餘年甚有能名時人稱為裴馬

後有盧李

盧從愿睿宗時拜吏部侍郎中宗之後選司頗失網紀從愿精心調理大稱平允李朝隱同時典選時人稱曰前有裴馬後有盧李

弘景嚴正

韋弘景轉吏部侍郎銓綜平允權邪憚其嚴正不敢干以非道

岑羲勁廉

岑羲進吏侍時崔湜鄭愔及李元恭分掌選皆以賄聞獨羲勁廉為時議嘉仰並本傳

汰擇士類

溫彥博遷檢校吏部侍郎彥博欲汰擇士類寡術不能厭眾訟牒盈庭時議頗譏

甄別士庶

陸彥師為吏侍隋承周制官無清濁彥師在職凡所任人頗甄別於士庶同上

識刀某姓

天官郎中李至遠權知侍郎時有選人姓刀又有王元忠並被放乃密與令史相知減其點畫刀改為丁王改為士擬授官後即添成文字至

遠一覽便曰今年銓覆萬人總識姓名安有丁士姓名此必乃某也省內以為神明

會要

令裴畧嘲

温彦博為吏侍有選人裴畧被放乃自贖於彦博稱解嘲諱彦博即令嘲屏墻略曰高下八九尺東西六七步突兀當廳坐幾許遮賢路彦博慚而與官唐新

李下無蹊

李知遠知選吏肅然斂手又號李下無蹊又李又進吏侍請謁不行時人語曰李下無蹊徑本

李士多附

李季卿拜吏部侍郎俄而兼御史大夫奉使河南江淮宣撫振拔幽滯進用忠廉時人稱之在銓衡數年季卿有宇量性識博達與善人交襟懷豁如其在朝以進賢為務士以此多附之

與邊遠官

唐崔鄆判吏部東銓事文宗召三銓謂之曰卿等比選令錄如何注擬鄆曰資序相當問以為治之術見可否而擬之帝曰依資合得而才劣者何授對曰與邊遠慢官帝曰以不肖之才治

邊民則疾苦可知也朝廷遠近皆願得人苟非其才人受其弊尋拜吏部侍郎

便江南選

唐興元初劉滋為吏部侍郎往洪州知選事時言師興之後天下蝗旱谷價翔貴選人不得赴調乃命滋江南典選以便江嶺之人時稱舉職並分紀

開門無禁

姜晦為吏部侍郎性聰悟識理體舊制吏曹舍宇悉布棘以防令史與選人交通及晦領選事盡除之大開銓門示無所禁私引置者晦輒知之召問莫不首伏初朝廷以晦改前規咸以為不可竟銓衡得所賄賂不行舉朝服歎

選才得宜

劉林甫正觀初遷吏部侍郎初赴選者以十一月為始至春即停選林甫奏請四時聽隨到注擬當時咸以為便時天下初定州府及詔使多有赤牒授官至是停省盡來赴集將萬餘人林甫選才銓擢咸得其宜時人以林甫典選比隋之高孝基

選舉志

人推強直

韋陟嘗任吏部侍郎有一致仕官叙五品陟判之曰青壇展慶曾不立班朱紱承榮無宜拜卧時人推其強直

帝謂勇決

隋楊恭仁大業初轉吏部侍郎楊玄感作亂煬帝制恭仁率兵經畧與玄感戰於破陵大敗之軍旋煬帝召入內殿謂曰我聞破陵之軍唯卿力戰功最難比雖知卿奉法清鎮都知勇決如此

吏不容私

綦北海先生宓禮維楊兵革之後省曹簿書殘毀幾盡公再執銓衡時爲吏部侍郎熟於典故衣冠調集與朝政公革討論漫無成案可放者公援據該審徐出一言以決吏不得容其私詔重刊七司條勅公所建明悉著于今自是省曹除授皆有案驗

李益能撰行狀

吏不得肆

洪文安公遵字景嚴公爲吏部侍郎先是選人諸曹改秩予奪一出吏手公乃隨事疏理吏不

得肆言行錄

陳擢孤寒

陳堯咨判流內銓舊制選人皆用奏舉乃得改京寺官而士有孤寒不為人知者堯咨特為陳其功狀而升擢之仁宗實錄

孫論優伶

孫逢吉字從之進吏部侍郎朱公熹之去公力救之侍郎彭公龜年補外又言不應為近習而逐正人一日會食部中或報王喜除閤門祗候公曰此乃優伶嘗於內庭效朱侍講容止以儒

為戲者豈可以污清選當抗疏力爭否則於經筵論之飛語上聞內批為郡樓攻媿集

厲色必容

苗晉卿知吏部選事性謙柔選人有訴訟索好官者雖至數千言或聲色甚厲者晉卿必含容之拜吏部侍郎前後典選五年政既寬弛胥吏多因緣為姦賄賂大行

點頭更擬

蘇晉為吏侍裴光庭知尚書事有過官被却者就籍以朱點頭而已晉因榜院曰門下點頭者

更擬光庭以爲侮已出晉茲州刺史

高枕而卧

許子儒以學藝稱長壽中官至天官侍郎子儒居選部不以藻鏡爲意委令史勾直以腹心注官之次子儒但高枕而卧時云勾直平配由是補授失序無復綱紀道路以爲口實

非錢不行

鄭愔掌選贓污狼籍有選人繫百錢于靴上曰當今之選非錢不行

古今文集

雜著

謝轉吏部侍郎表 歐陽脩

驟膺渙渥備瀝愚誠雖至辭窮罔避煩言之爲黷重乎令出莫回成命於已行祇受以還驚惶失節臣某中謝伏念臣學未通於原本材不足以經綸但知守拙以爲忠每務師心而自信徒以遭逢先帝拔自衆人久參侍從之職遂玷機衡之貳而屬大橫啓兆嗣統膺期方爲政之清明思百度之修理內量譎薄實憂以聖而責愚矧迫衰殘方念乞身而告病不謂皇慈曲被寵

數屢加當覃大慶之初已無功而冒賞曾未踰
年之久復進秩以叨榮此蓋伏遇 皇帝陛下
聖政惟新用人務廣謂才難於求備思悅使以
忘勞憫其勤劬錫以優洽雖恩踰於望表亦寵
與其憂并誓殫犬馬之微少荅乾坤之造

代謝吏部侍郎表

樓鑰

代言西掖方拜誤恩攝貳東銓復叨改命循墻
莫避臨谷增危 中謝 伏念臣濩落無堪迂愚自
信正以經營於菽水故嘗希望於斗升昨自外
官恭趨嚴召猥厠內朝之鵷列親覩上聖之龍

飛五歷粉闈一參月寺籌邊戎幕無婉畫之可
稱將命虜庭幸歡盟之復締冒柱史詞臣之選
兼宮端寶牒之司初無左右之先容盡出聖神
之親擢忽承帝制俾倅天官一新龜紫之榮仍
假銓衡之長莫回成渙徒激懦衷茲蓋伏遇
皇帝陛下虛以受人明於分職憐臣孤立於官
路借以末光謂臣曾歷於劇曹付之重委臣敢
不寅遵邦憲嚴制吏姦朝夕論思雖素乏嚴吾
之譽簿書期會庶免追裴馬之名

謝吏部侍郎表

鄒浩

代言西掖已冒至榮列職中臺更塵高選拜恩
優渥撫已兢慚中謝竊以六典治邦周重天官
之任三銓綜吏唐推文部之權洪惟神考之正
名肇復先王之成憲迄至今日益昭聖功宜得
真才以貳選事而臣猥從廢斥特荷哀憐俄擢
寘於近班獲預聞於機要事 陛下有如上帝
敢萌一念之欺仰 陛下何啻高山終乏纖埃
之補未正空飡之責遽叨越次之升靖言思之
可謂幸矣此蓋伏遇 皇帝陛下孝隆維志道
廣用中欲多士之無朋故孤立者與進欲四方
之不擾故愚守者并容爰舉斯心俾祗厥序臣
敢不激昂遭遇飭厲猷為念此餘生實神聖之
再造誓殫綿力稱寵祿之殊私

辭免除權吏部侍郎狀

吳永叔

渙若出綸震于聞命寵以甘泉扈從以侍臣為
邦家之光選部典銓以小宰為人物之鑑匪疇
宿望曷稱親除如臣者猥自遐陬躡登朝序才
能甚短如鼎之不可以柱車文體近浮如玉之
不可以為穀偶值清朝之更化忽陪羣彥以同

升繆當記注之筵復玷詞翰之選赤墀載筆幾
瞻言動之容紅燭燃窗兩被傳宣之寵雖曰儒
生之榮遇每慚往哲之高風方戒滿盈又叨甄
擢官清易曠甫半歲而三遷恩重難酬不一月
而再命倘冒承於殊渥恐交噴於煩言伏望
聖慈俯矜愚悃於贊書之未出擇髦士之攸宜
庶安私情允愜公論

第二辭免狀

吳永叔

重惟吏侍之選實高諸曹非知人之明不足以
鑑裁流品非秉法之正不足以檢柅吏姦比者
某共貳之初以郊退朝以辰入局典吏抱案選
官滿庭愛惜分陰僅可區撥而才不周於繁劇
智不足於眇綿以所不能之人居所甚重之職
因循之久易生垢玩豈圖異渥復畀陳人若貪
戀恩榮冒昧以處則必以庸踈抵於曠敗欲望
朝廷特賜敷奏得從寢免庶幾上不以累聖鑒
下不以溢愚分

辭免兼權吏部侍郎申省狀

洪咨夔

蒙恩便蕃聞命兢惕竊以詞垣四禁稽緩為先

選部三銓繁劇尤甚專掌尚虞於弗暨兼官必
至於多違伏念某學問空疎材識譎陋領內史
之職舉乎一而未能參小宰之職共其二以何
有雖代庖而越俎將毀瓦而畫墁欲望朝廷特
賜敷奏念御馬不容於窮力而牧羊每患於多
岐俾塵舊官亟寢新命少安愚分實戴隆私

謝吏部侍郎表

周必大

嚴近叨居夙負瘵官之責武文迭試更膺換部
之榮襲衣頒在笥之珍寶帶錫章身之寵仰慙
主眷俯愧輿言臣某中謝臣聞古之銓綜存乎

人今之銓綜一於法存乎人固可以得士然其
弊也嘗由予奪之不公一於法固可以減私然
其弊也或致賢愚之同滯而况簿書紛若胥史
雜然苟稽察之弗精將混淆而莫辨欲酌古今
之中制當令人法之並行庶稍戢於吏姦亦少
伸於士氣豈容虛受以累明揚伏念臣性鄙習
迂志卑才下早親翰墨弟爲書生陳腐之談久
侍軒墀初乏禁從論思之語引去則殊私之未
報欲留則高位之難安方進退之靡寧忽選除
之下逮肺腑抱履冰之懼面顏形撻市之羞被

此光靈若爲稱塞茲蓋伏遇 皇帝陛下乾行
不息日照無私知人非堯帝之難巧壬奚患選
衆有臯陶之舉枉直自分夫何一介之臣乃冠
貳卿之列臣敢不遵承法令振拔滯淹雖微冰
鑑之明上裨睿哲姑守權衡之信仰助公平苟
不辱知斯爲報國

謝吏部侍郎兼權直學士院表

孫覲

承流支郡方叨左省之除擢貳選曹更代北扉
之直寵恩深厚小已凌兢中謝臣聞虞書三載

黜陟之文周官羣吏誅賞之法歷時千載分總
四銓圖籍浩繁官曹猥衆諸郎寄坐老吏專家
二年干戈俶擾之餘一時水火焚漂之後千瘡
橫潰三窟旁穿世號杞椎坐嘲銅臭士無固志
端若視馬曾然官不即工但直書紙尾耳深惟
流弊常激懦衷使夫人皆從容而自居則誰當
以奮發而爲意攬轡而上粗有意於澄清奏刀
欲前了無施於盤錯空慙綿力實負初心茲蓋
伏遇 皇帝陛下剛德方亨大明繼照深鑒百
王之弊一清多士之源偶以乏才遂當殊獎圖

難有欲速之戒矯枉在馴致之功輸夙夜之勞
儻遂愚公之志效涓塵之報庶逃黜伯之譏

吏部郎中

歷代沿革

周官太宰屬官有下大夫蓋郎中之任也**秦**有郎中以其爲郎侍衛居中故曰郎中**漢**選尚書郎初從三署郎次補之初入尚書臺稱郎中滿歲稱侍郎故郎中之名猶因三署舊號**後漢**置吏部郎中職在選舉**魏晉**用人妙於時選其諸曹郎功高

者遷吏部郎中歷代品級皆高於諸曹郎**魏**

晉**宋****齊**吏部郎品第五諸曹郎第六**梁**吏部

郎品第四班第十一**陳**因**梁****後魏****北齊**吏部

郎品正第四上諸曹郎品正第六上**後周**依

周官**隋**煬帝改吏部郎爲選部郎**唐**吏部郎

中二人龍朔二年改爲司列大夫咸亨光宅

神龍並隨曹改復一人掌小選未入仕而吏

京司者復分九品通謂之行署其應選之人

以未入九流故謂之流外銓**宋**元豐官制行

置吏部郎中四人尚書選二人侍郎選各一

人參掌選事而分治之凡序位有品選官有
格分任有職寓祿有階皆以事稽攷審核其
狀質成於長貳而後行焉建炎三年詔三選
各一員大元仍唐宋舊置吏部郎中二人

羣書要語

乃統胥徒是稱小選席豫楊仲宣
碑六官之屬曹郎首之白集除李

建制參我六典冠于諸曹云有簿書以旌淑

慝擇刀筆以決臧否剖疑析滯揮翰如流選部

以清繫公是賴並同上銓衡庶品歷選賓僚陸

倭表才盛居東之佐禮處司南之重高選彭毛士

以分劇曹常集鄭員外制天官之屬號為劇曹

初寮王琮制任參六典選重一時類要尚書正

本而吏部天官綜敘羣才以成天下之治郎於

典領其選甚高南豐除曹稷制

詩句吏部提英鑒片善蒙采錄黃山谷吏部信

才傑文鋒振奇響調與金石諧思逐風雲上梁

沈約悼齊謝朓兩人同日事征西今日君先捧

紫泥裴度柳公綽俱為判官公綽先入為郎度

以詩餞云

古今事實

超遷郎中

後漢吏部郎典劇多超遷者

稍遷郎中

齊庾杲之司空劉劬見而竒之曰是使江漢崇望杞梓發聲稍遷吏部郎中參選大事齊書

舉一吏郎

後魏度碩創革舊制選置百官謂羣臣曰爲武舉一吏部郎合即三日假尋曰朕已得之矣乃徵亮爲之亮曰參選事垂三十年廉謹明決尚書曰非崔郎中選事不辨

覓一吏部

褚亮每屬栢彛覓一佳吏部彛曰與縣宰徐寧海岱清士即遷吏部

崔亮明決

後魏漢文帝欲創革舊制選置百官謂羣臣曰爲朕舉一吏部郎合郎三日假尋曰朕已得之矣乃徵崔亮爲之亮字敬孺自參選事垂二十一年廉謹明決尚書曰非崔郎中選事不辨北史

劉鼎風稜

劉鼎清泰中爲吏部郎中兼侍御史知雜事鼎

性若寬易而典選曹按吏有風稜五代史

阮咸寡欲

山濤舉阮咸為吏部郎中曰清真寡欲萬物不能移也世說

陸准正人

吏部郎典碎事日夜相接非但當正已而乃當能正人議郎杜點德履亦佳太子庶子崔諒中郎陸准皆有意正人其次不當審有可用者否山濤啓事

設長名榜

吏部郎中裴行儉始設長名榜列銓注期限等法又定州縣升降官資高下以為故事長名榜自此始也選舉志

定朝儀令

後魏鄒淵博覽經書太祖定中原擢為吏部郎淵明解制度多識故事與崔玄伯參定朝儀律令音樂及國文記詔策多淵所為也

傾朝送別

何尚之字彥德為吏部郎告休定省傾朝送別及至郡父叔度謂曰聞汝來此傾朝相送可有

幾客答曰殆數百人叔度笑曰此是送吏部郎中非關何彥德也昔殷浩亦嘗作豫章定省送別者甚衆及廢從東陽船泊征虜亭積日乃至親舊無敢相窺

百姓追送

褚翔爲義興太守徵爲吏部郎去郡百姓老少追送出境翔居小選公清不爲請囑易意號爲平允選侍中

庭植嘉樹

顧憲之爲尚書吏部郎其祖凱之嘗爲吏部於庭中列植嘉樹謂人曰吾爲憲之植爾後果爲此職

師爲模楷

隋李德林爲吏部郎陸昂命其子與德林周旋誠之曰汝每事宜師此人爲模楷

尉得遷官

晁補之字無咎爲吏部郎中有嶺外尉爲獲盜八人法當改官考功謂獲盜不同處曲沮其賞持之不決尉客京久窘甚詣公訴之公憫然一日當奏即爲上之七日得遷官於是吏畏服部

無留事

丁未錄又見張文潛集

上常目送

曾肇謚文昭官制行除吏部郎中每便殿引選人上常目送之出殿門而已揚龜山撰行狀

古今文集

雜著

吏部郎中廳壁記

獨孤及

太微五帝星座後五星曰郎位秦漢之君則而象之乃建郎中至魏世祖分尚書曹爲六郎各六人今之吏部魏之選曹也掌選舉銓覈以

正公卿大夫士羣吏之品位凡廢置之柄官府之序歲終令天下郡縣會計致事而郎官起草立議操而成之然後尚書受成於郎中之選非楚金百鍊顏弓六鈞不與也故居官者不由選曹郎而進罔以見其才之餘地亦猶刀劍之刃未嘗屠大牛切大玉則雖曰我且以爲鑄鄒人猶疑之由其塗而升驟必環周三臺翰飛兩掖登喉舌秉刀尺者什七八諸曹郎莫敵也歲在乙巳河南賀若公用貞幹諒直實涖厥位往歲公爲外郎也東曹朗然如得水鏡治餘杭也吳

人熙熙若逢陽春今也來思八法在手操割成務彌
綸舊章厥如初政嘗以前哲軌躅我之韋絃而武
德以來廨署鼎新者數官曹易名者五若姓不表
年不紀是廢德也將來何觀故謹而列之俾我曹
之春秋存乎右座其選部司列天官文部之目各
因其所革時之先後冠於其首以為志云

吏部員外郎

歷代沿革
周官太宰屬官有上士蓋今員外
之任也**宋**百官階次有員外郎**後**

周依周官**隋**文帝開皇六年尚書省二十四
司各置員外郎一人以司其曹之籍帳品從
第六謂曹郎本員之外復置郎煬帝三年廢
尚書諸曹各置員外郎一人吏部置二人**唐**
龍朔咸亨光宅神龍並隨曹改復**宋**尚書諸
司員外郎正七品**大元**置吏部員外郎二人
吏部員外郎掌選院謂之南曹**注**
其曹在銓曹之南故謂之南曹**唐**
六典吏部員外郎二人掌文選以三銓之法官
天下之材其投試銓注與流內畧同謂之小選

羣書要語

詩句 吏部信才傑文鋒振奇響調與金石諧恩
逐風雲上 梁沈約悼齊謝朓 吏部提英鑒片善
蒙采錄 黃山谷 今日君先捧紫泥 柳公綽與裴
度俱為判官綽入為吏部郎度作詩餞云

古今事實

吏部省眼

唐吏部郎中二廳先小銓次格式員外郎二廳
先南曹次廢置舊說吏部為省眼 分紀

南宮眉目

韋陟字商衡為吏部員外郎是曹在南宮為眉
目在選士為司命公執直筆閱簿書紛拏盤錯
一瞬而剖 劉禹錫撰神道碑

銓叙稱美

唐崔郾姿質秀偉神清雅人望而愛之為吏
部員外郎奸吏不敢欺孤寒無援者不至留滯
銓叙之美為時所稱

判析有條

唐李栖筠遷吏部員外郎判南曹栖筠判析有
條奸吏氣奪號為神明

簿最詳緻

韓滉遷吏部員外郎性強直明吏事在南曹五年簿最詳緻

吏事第一

裴遵度遷吏部員外郎專判南曹天寶中海內無事九流輻湊會府每歲吏部選人盈萬遵度敏識強記精覈文贍詳而不滯時稱吏事第一由是大知名

鈐制官吏

唐皇甫鑄為吏部員外郎判南曹凡三年頗能

鈐制官吏改吏部郎中

旌別能否

唐牛徽遷吏部員外郎乾符中選曹猥濫吏為奸弊每歲選人四千餘人徽性貞剛特為起請由是銓敘稱正能否旌別物議稱之

思制吏奸

紹興三十年以劉珙為吏部員外郎珙在銓曹時苦吏為奸思有以制之一日命張幕設案置令式其中使選集者得出入繙閱與吏辨吏無得藏其巧人甚便之長編

復清選部

劉崇望字希徒轉吏部員外郎崔安潛為吏部尚書崇望判南曹滌除宿弊復清選部唐書

朕欲見久

陳傅良奏事入修門鬚鬢如雪丞相留公正一見歎曰幾年陳君舉尚可使外補邪奏留為吏部員外郎初對上曰卿去國幾何時朕欲見卿久矣知卿抱負學問深醇有所著書進來時上臨朝淵默罕有聖語公敬謝而退以周禮說進擢秘書少監樓攻媿集

上為矍矍

張拭召為吏部員外郎廟堂用史正志為發運使奪州縣財賦遠近騷然拭為上言之上曰正志以為非取之民公對曰今州縣財賦大抵無餘不過巧為之名以取之於民耳上聞之矍然顧拭曰論此事者多矣未有能及此者如卿之言是朕假手於發運使以病吾民也閱實如拭言即詔罷之楊誠齋集

古今文集

雜著

吏部員外郎南曹廳壁記

權德輿

漢廷尚書郎辨章制度主文書起草之任東漢
方冠以曹名用諸曹功次超卓者轉遷選部魏
晉已還其任寢劇國家紀律昭明官修其方凡
薦紳之倫未命爲大夫者滿歲皆調於轂下啓
事賦祿必先有司初上元中天官趙郡李敬玄
號爲稱職以覆視官簿差次裁成端本肇末不
得不重乃請外郎一人顓南曹之任其後或詔
同曹郎分主之或詔他曹郎權居之皆難其才

而慎斯舉也大抵膺是命者多士必屬耳目焉
以其公私能否之間不可遏也以事之委會吏
之竒衰因緣詭故中若市道居之者通明閭畧
靡或深刻苟成績於是則翰飛不暇登二掖贊
六職得之夷易疾若傳置太原王仲舒字弘中
溫毅廉直清方敏資風神豪爽邁乎羣倫貞元
十年冬繇諸侯部從事賢良對策歷一右諫列
儀曹考功郎十八年實受斯命類能故也於是
用堅明忠恕行理官業程品具舉尤違自絕然
後以狀之成質於軍宰小宰罷退者不讒受祿

者不誣恢恢然投其虛而芒刃不頓君子以弘
中之道為折中矣昔春秋書士穀曰堪其事也
魯語曰署所以朝夕虔君命也上因官署而舉
事任春秋丘明之志也至若龍朔咸亨改復之
說此皆不書

吏部分掌

封誥科

應給制誥

○舊司封

應封蔭

贈遷

歷代沿革

舊主爵郎 **北齊** 置主爵郎中一人
隋 文帝為主爵侍郎煬帝改為主
爵郎 **唐** 龍朔二年改司封大夫咸亨元年復

加光宅元年改司封郎中神龍元年復故開
元二十四年復為司封 **宋** 於右掖門置院四
司誥身案並集于此以備中書除改本司郎
官各主其事淳化五年始專置官司於省內
凡官誥各以本司誥身印印之文臣用吏部
武臣用兵部王公命婦用司封加勳用司勳
掌文武官將校誥身及封贈官誥院提舉一
人以知制誥充判院一人以帶職京朝官充
元封五年行官制文武誥身屬吏部蕃官誥
屬兵部封贈及命婦誥屬司封加勳并將校告

屬司勳官誥院四部誥身案及吏人隨事隸本部七年併司封司勳誥身案入吏部預書庫收掌崇寧四年吏部專置造官誥局五年罷令尚書右選主管大觀元年復置尋改為官誥院仍隸左右司三年復罷歸吏部政和三年六月詔依舊置官誥院差官二員主管少府監鑄印記吏部製造誥身案記為文建炎以來因仍不改

大元無專曹官封誥以令史分頭掌之

羣書要語

司封郎中掌封命朝會賜予之級凡爵九等庚官志封爵之恩施於

內外國之典也主以郎吏寵秩甚優曾南豐除王祖道制宜寵左曹之秩用優主爵之名胡文恭

古今事實

執秩

晉文公作執秩以正其官注執秩主爵之官左傳

典封

後漢馮勤為郎中給事尚書使與諸侯封事本傳

公權入奏

唐柳公權為司封員外郎入奏帝曰見卿筆蹟久矣因問用筆法權曰心正則筆正乃可法矣

本傳

孝武同省

正觀中韋孝武為主爵郎中與兄弟同省時號三列宿唐史

上科舉議

宋王介甫用事議論素異還朝寘之官誥院介甫欲變更科舉上疑焉公議上悟曰吾故疑此得蘇軾議意釋然矣即日召見蘇頲演集東坡行狀

此代言手

宋京鏗字仲遠參政龔茂良薦公于孝宗轉主管官誥院先是茂良帥豫章日得公牋奏之文竒之曰此汪彥章代言手也尤職兩月詔從臣舉良縣令為執法官給事中王希呂以公應書即召見曰卿議論通明有用材也是日除監察御史楊誠齋集

古今文集

雜著

官誥院題名記

虞似良

士自一命以上至于公卿凡除授誥命必繇院

以給之則居是職者爲甚重而不輕矣故謹其
付給而守其貳今視他司爲嚴唐制百官誥身
分掌於其所部文則吏部掌之武則兵部掌之
宗室命婦司封掌之考校勲績司勲掌之國初
悉因唐舊置院於右掖門之左凡吏兵封勲四
司之告舉集諸此淳化五年始專置局命中書
舍人一員提舉而以朝官一員判局事於是職
任踰重元豐改制廼以文武官誥身悉隸吏部
而以蕃官隸兵部崇寧大觀或置或不大抵廢
則皆歸吏部右選政和復置院仍差主管官二
員中興以來因仍不改然自紹興至今四十餘
年中間官吏殆無有記之者名氏到罷濶不可
見事之因循苟且豈特此哉似良不才承乏是
官思有以紀會同寮魏君相與討究自薛僊而
下得五十五人勒諸石庶使來者尚有考也乾
道七年十月既望記

官誥院續題名記 丁伯桂

誥院題名石昉於乾道七禩紹興改元易而大
之紹定辛卯之秋鬱攸爲沴屋與石俱燬營建
既新亟求舊題副墨壽之石立新石列爲二經

始於趙君與憲成於林君杲謂余曾居是官諗
識之欽惟皇朝以名器砥礪天下士命詞於西
掖而受給於誥邸要使爵德賞功之意雷行域
中光被萬物所係亦大矣在昔名公率多發軔
于此不但位台衡持從橐登要路爲足垂榮某
人節行著聞某人勲業赫奕一目畢見使來者
知所勸是亦補助教道之一紹定六年十一月
既望記

官誥院續題名記 汪詢之

乾道辛卯官誥院始創題名石易于紹熙庚戌
燬于紹定辛卯今江淮大使觀文趙公與憲來
庀厥職爰立二石鴈行之后二十七年當寶祐
六年石當續僕適承乏乃暨同僚姜君士龍闔
辭以諗于公公捐楮二千緡佐其費及在外麾
節之曾居是官者致助各有差於是石續而三
矣恭惟國朝以好爵靡天下士文武之臣各以
其職受命而榮辱予奪之機廼寄於盈尺之誥
司存顧不嚴且重歟凡得策名於石者當以羔
羊素絲之誥厲其節以絢衣惡文之質養其才
又以朝廷之所以懋德懋功者自懋其器業使

前者規後者隨輝聯光映聲鬯實流國家將於是有賴焉豈直能大其官而已是年五月既望記

勲封科

應封食邑實封

如王一萬戶郡王

五千戶之類

親王公主應國封

號之類

舊司勲

歷代沿革

周官有司勲上士一人凡有功者司勲詔之**後周**夏官有司勲一人掌功勲之賞**隋**文帝立司勲侍郎二人煬帝改為司勲郎**唐**武德初為司勲郎中龍朔元

年改為司勲大夫掌邦國官人之勲級凡勲

十有二等十二轉自上柱國至武騎尉凡十

二凡有功之人合授勲官者皆委之覆定然

後奏擬**宋**司勲掌賜勲定選錄用世勞凡官

吏軍民應賞而隸有司施行者則審覆而駁

其繆誤**大元**無專曹官有勲封科以令史

分頭掌之

羣書要語

司勲掌六卿賞地之法以等其功王功曰勲國功曰功民功曰庸事功曰勞治功曰力戰功曰多凡賞無常輕重

功周禮掌校定勲績論功行賞職員令

古今事實

詞人稱首

唐張九齡遷司勳員外郎張說謂人曰後來詞人稱首本傳

郎吏得人

唐張循憲薦張嘉貞奏對侃侃武后悅擢循憲司勳郎中酬其得人時功狀盈几郎吏不決嘉貞以為詳處廷無留牒張加正傳

論安石配饗

宋趙忠簡公鼎字元鎮公為司勳郎官乃言自王安石用事肆為紛更祖宗之法掃地而生民始病蔡京托名紹述盡祖安石之政以致大患今安石猶配饗廟廷而京黨未族何以收人心而召和氣哉言行錄

遠秦檜擅事

宋陳文正公康伯字長卿自公為郎時為司勳郎官秦檜方擅事公雅有素乃澹然其中檜雖稱公靜重常越用他人公不以為意在省五年始為軍器監同上

考選科

諸科選 文資選 右職選

宮中選 諸司選 除由

磨由 司計

監當官別置外選 ○舊考功

歷代沿革

漢曹郎二人掌天下歲盡集課元帝時京房作考功課吏之法然其

職不在尚書至光武改尚書三公曹主歲書

考課課諸州郡魏尚書郎曹有考功郎中一

人宋齊並置功論郎中梁有功論侍郎隋文

帝置考功侍郎煬帝改考功郎唐龍朔改爲

司績大夫武德舊令考功郎中監試貢舉人

正觀以來乃以考功員外郎專掌貢舉省郎

之殊美者至開元移貢舉於禮部而考功員

外郎分判而已宋考功判司事一人以帶職

朝官或無職事朝官充凡考課之法分隸他

司或以他司專領本司但掌覆太常擬謚及

幕府州縣官流外較考之事元豐官制行郎

中員外郎始實行本司事續會要初除蔡洵

蔡京職畧掌文武遷叙磨勘資任考課之政

令凡命官隨所隸選以其職事具注於曆給

之於其屬州若司歲書其功過應升遷選授者驗曆按法而叙進之有負殿則正其罪罰以七事考監司以四善三最考守令凡改服色者以年勞計之應謚者覆太常所定行狀報尚書省官集議以聞凡立碑碣名額之事掌之舊置考課院其定殿最皆有考辟大元無專曹官有考選科以令史分頭主之

羣書要語

掌文武百官功過善惡之考法凡百司之長歲較其屬功過善惡以九等大合衆而讀之流內之官叙以四善善狀

之外有二十七最

唐百官志

及功臣家傳碑頌

誅謚等事

同上

主羣吏之課而議其誅賞郎於

天臺任屬尤重

曾南豐除蔡京制

計羣吏之治

而明黜陟之法臺郎典引列於左曹又除呂和

卿制

詩句

稱意新官又少年秋清身健好朝天

白樂

天送霍考力

古今事實

鶴廳

唐考功員外郎廳事有薛稷畫鶴宋之間爲贊

南曹 見後裴請事

挾印赴行在

唐裴諝遷考功郎中代宗幸陝諝徒挾考功南曹印赴行在上曰疾風知勁草本傳

墨書絕吏姦

唐王徽轉考功員外郎時考簿上中下字朱書吏緣為奸多有指改徽白僕射請以墨書

鄭澣敏識

鄭澣為考功員外郎刺史有驅迫人吏上言政

績請刊石紀者澣探得其情條奏廉使巧迹遂露人服其敏識分紀

仲舒文名

王仲舒有文名遷考功員外郎奏議詳雅省中伏其能

辭判精密

裴珀遷考功員外郎侍郎鄭珣瑜考校辭判研覈精密皆值才實

典選平允

嚴挺之開元中為考功郎中典選二年大稱平

允並本傳

進絀清明

席豫遷考功員外郎進絀清明拜吏侍元宗曰卿考功職詳事先故有今授

黜陟詳當

趙宗儒傳正元六年領考功事黜陟詳當無所回避

不避權倖

穆宗即位召李渤為考功員外郎校定京官考不避權倖皆行黜陟

務覈實才

唐王丘傳開元初遷考功員外郎異時多請託丘務覈實其才

吏無以欺

王仲舒弘中在考功吏部提約明故吏無以欺

韓文正公神道碑

人以為便

考功員外郎魏矰字邦達守監察御史矰在考功郎選案牘不存吏緣為奸川陝官到部者多以微文沮抑往反輒經年矰請細節不圓處悉

先放行人以為便 中興系年錄

非蘇不可

韓休作蘇頲集序云屬考功員外郎闕時中書令李嶠執筆曰考功郎非蘇君不可遂拜考功員外郎

得王遂清

王信字成之權考功郎有選人張公選初一年免銓至是改秩吏妄引復令柅之公鈞察其故吏怖服又有三蜀士實礙式吏受賂為道地趙衛公為工書以囑公持弗聽已而轉臨天官閱審成積拊掌愧歎嗟激不已至白于上前他日上謂尚書蔡洸曰考功得王信銓曹遂清邏者私相詣指為神明 同上

謚改文莊

宋劉敞判尚書考功仁宗賜夏竦謚曰文正敞言謚者有司之事也竦之行邪而陛下謚之以正不應法疏三上仁宗為更竦謚曰文莊 東都事畧

古今文集

律詩

送考工崔郎中赴闕 白居易

稱意新官又少年秋涼身健好朝天青雲上了
無多路却要徐驅穩著鞭


詩話

專心望考工

唐王尚客為侍御史自以才望清華妙當入省
常望前行忽降膳部員外郎微有惋悵張恭忠
詠曰有意嫌兵部專心望考工誰知脚股瞪却
落省墻東

新編古今事文類聚卷之十一

新集



存
56/
夕

國
書
藏
圖